

DIZRA' CHAWE' CA NACA CHEĒ JESUCRISTO DA BZUAJ SAN JUAN

Bénnea' le' Xrtizra' Dios dxaque' bénneache

¹ Gate guzú lau zua xúgutē da de, ba zúaqueze Bénnea' le' Xrtizra' Dios, da zéaje na Benne' naquē dutē da nácaqueze Dios, na' Bénnea' le' Xrtizra' Dios zúalenē Dios, ne nácaquezē Dios.

² Nédxudautē Benne' nigá zúalenē Dios.

³ Lu na' Benne' nigá ben Dios xúgutē da de. Quebe bi de da quebe nun Le'.

⁴ Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache cheē xelaca banē'.

⁵ Xel-la' naxaní' nigá dxusení na lu da chul-la cheē dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

⁶ Guzúa tu benne' le' Juan, gusel-la Dios benne'.

⁷ Benne' nigá blē'ē cheē bchálaje' ca naca cheē Bénnea' naquē xel-la' naxaní' nigá, cheē xeléajlē xúgutē bénneache cheē Bénnea' nē cheē da dxenné'.

⁸ Juan nigá quebe naquē xel-la' naxaní' na'. Blē'ē cheē bchálaje' ca naca cheē Bénnea' naquē xel-la' naxaní' nigá.

⁹ Xel-la' naxaní' li, da dxusení na lu xichaj lázrdau xúgutē bénneache ba za' la' na lu xezr la xu nigá.

10 Bénnea' naque' Xrtizra' Dios zue' lu xezr la xu nigá, na' lálala ben Dios xezr la xu lu na' Bénnea', bénneache zaj zre'e lu xezr la xu quebe belexexúnbe'e Le'.

11 Ble'e naga zua da naca chee', na' benne' lazrie' ca' quebe gulezí' lu ne'e Le'.

12 Benne' ca' gulezí' lu ne'e Le', ne guléajle'e chee', be'e benne' caní lataj xelaque' bi ca' chee' Dios.

13 Benne' caní québedxa zaj naque' ca zri'ine bénneacheze, bi ca' dxelálajbe' ne chee' bénneache, u ne chee' da dxezá lazre' tu benne'. Benne' caní zaj naque' bi ca' chee' Dios ná'queze.

14 Bénnea' naque' Xrtizra' Dios gúlajé' ca tu bénneache, na' guzúe' ládujla dxi'u, zaj zúale xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee' Zrí'ine' tu licha'.

15 Juan bchálajé' ca naca chee' Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxute' ca neda'.

16 Xúgutēdxu ba guzidxu xel-la' zri'i lazre' chee' da dxúnnaqueze Le'.

17 Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo.

18 Netú benne' quebe ne lé'ene' Dios. Zrí'ine' tu licha', bi nazrí'ite' lazre', benne' nigá guque' tuz ca nácaqueze Xre'.

Juan, benne' bchue' bēneache nisa, dxexechebe' chee Jesús

(Mt. 3.11-12; Mr. 1.7-8; Lc. 3.15-17)

¹⁹ Benne' xíchajē ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchebe xánnie' le' nu naque'.

²⁰ Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

²¹ Nadxa buluchebe' le':

—¿Nuzra nacu'? ¿Nacu' Elías, bēnea' bchálaje' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bēnea' dxal-la' le'e, ne guchalaje' waláz chee Dios, ca da gunná Moisés dxal-la' gaca na?

Le' bechebe':

—Cabí.

²² Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' chee benne' gulesel-le' netu'. ¿Bi dxennáquezu' nu nacu'?

²³ Juan bechebe':

—Neda' naca' bēnea' naxúaj na ca naca chee' lu xiche chee Dios, da dxenná: Wen chi'i tu benne' dxebezre xe'e le'e xixre' lawe' lataj, dxenné': “Le salaj tu neza li naga te Xránadxu.” Naquen cáteze gunná Isaías, bēnea' bchalaje' waláz chee Dios.

²⁴ Benne' xudau' fariseo ca' gulesel-le' benne' caní chee cheajlechálajle' Juan.

25 Le' buluchebe' le':

—Che lue' quebe nacu' Cristo, ne Elías, ne bënnea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bënneache nisa?

26 Juan guzre' benne' ca':

—Neda' dxuchúa' bënneache nisa lu nísaze. Zua tu benne' ládujla le'e quebe nézele ca szren naque'.

27 Benne' nigá ze'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrele' da xu'u ni'e.

28 Xúgutē da caní guca na lu xezr la xu chee xezre Betábara, da zua na chalá'a xegu Jordán naga dxalaj gubizra, naga zua Juan dxuchúe' bënneache nisa.

Jesús naque' Zríla'dau' chee Dios, be dxelutiē' lau Dios ne chee xtul-le'

29 Zra xula ble'e Juan dxezrín Jesús naga zue', na' gunné':

—¡Le nna'xque! Benne' nigá naque' Zríla'dau' chee Dios, cue' dul-la zaj nabaga bënneache.

30 Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudautē ca neda'.

31 Néda'queza' quebe gunezda' nu naque'. Bla'a dxuchúa' bënneache nisa chee xeleneze xezre Israel nu Benne' naca Le'.

32 Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analēne' Benne' nigá.

33 Neda' quebe ne nezda' nu naque'. Dios na' nasel-le' neda' chee guchúa' bënneache nisa, Le' guzre' neda': “Gate le'enu' Be' Lá'azxa xétaje' xegá'analēne' tu benne', Benne' nigá gunē' da zéaje

xel-la' dxedxúa nisa, guzúe' Be' Lá'azxa lu xichaj lázrdaule."

³⁴ Na'a ba ble'eda' guca da nigá, ne dxexecheba' nácaqueze Benne' nigá Zri'ine Dios.

Benne' nedxu ca' dxusede Jesús

³⁵ Zra xula zúaqueze na' Juan nen chupa benne' ca' dxusédene'.

³⁶ Gate blé'ene' dxedé na' Jesús, na' gunná Juan:
—¡Le nna'xque! ¡Benne' nigá naque' Zríla'dau' chee Dios, bia gáteba' ne chee dul-la nabágadxu!

³⁷ Dxúpatē benne' ca' dxusede Juan belenne' ca da gunné', na' xjácáleñe' Jesús.

³⁸ Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexílajle?

Benne' caní gulé'e Jesús:

—Benne' Wesede, ¿gazra zu'?

³⁹ Jesús bechebe':

—Le da nna'le.

Nadxa xjácáleñe' Jesús, ne belelé'ene' naga zue', na' belexegá'analene' Le' zra na' lawe' da bache zeaj du dxedá' tapa.

⁴⁰ Tu benne' chupa ca', benne' belenne' ca da gunná Juan, ne xjácáleñe' Jesús, naque' Andrés, benne' biche Simón Pedro.

⁴¹ Andrés nigá la guxíajte' xeajdíljaje' bi biche' Simón, na' guzre' le':

—Ba bezrélentu' Mesías. (Dizra' nigá zéaje na Cristo, Bénnea' guchebe lazre' Dios sel-le'.)

⁴² Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaję na: Pedro, da zeaję na: Xiaj.)

Jesús dxenné' Felipe ne Natanael

⁴³ Zra xula guca lazre' Jesús chéaję' naga nababa Galilea, na' bezrague' Felipe, ne guzre' le':

—Ben neda' tuze.

⁴⁴ Felipe nigá naque' benne' xezre Betsaida, da naca na lazre Andrés, ne Pedro.

⁴⁵ Felipe guxíaję' xeajdíaję' Natanael, na' guzre' le':

—Ba bezrélentu' Bénnea' bzuaj Moisés chee' lu xiche naga zaj naxúaj da nadxixruj bea na, ne cá'unqueze chee Benne' nigá buluzúaj benne' ca' buluchálaję' waláz chee Dios. Benne' nigá naque' Jesús, zri'ine José, tu benne' xezre Nazaret.

⁴⁶ Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

⁴⁷ Gate ble'e Jesús za Natanael naga zue', gunné':

—Nigá za' tu benne' naca xánnie' benne' Israel, benne' dxennéqueze' da dxéquene'.

⁴⁸ Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

⁴⁹ Nadxa Natanael guzre' Jesús:

—Benne' Wesede, Lue' nacu' Zri'ine Dios. Lue' nacu' Wenná Beā cheentu', benne' Israel.

⁵⁰ Bechebe Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá.

⁵¹ Da li dxapa' le'e, walé'equeze le'e naxalaj xabáa, na' gubáz chee xabáa ca' chee Dios dx-elétaje', ne dxelexegüene' naga zua neda', Benne' Gulje' Bénneache.

2

Dxaca laní chee wechaga na' lu xezre Caná

¹ Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zue' na',

² na' zua nu gunné Jesús, ne benne' ca' dxusédené' lu laní na'.

³ Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xelé'aje'.

⁴ Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

⁵ Xrne'e guzre' benne' wen zrin ca':

—Le gun ca naca da xe'e le'e.

⁶ Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxe'e nisa.

⁷ Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'.

⁸ Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'.

⁹ Bénnea' zué' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zué' dxu'a ga dxelawe' gunné' benne' wechaga na',

¹⁰ na' guzre' le':

—Xúgute benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na na'a.

¹¹ Da nigá da ben Jesús lu xezre Caná da nababa Galilea naca na tu xel-la' waca zrente da bene' nedxu, da ble'e na xel-la' szren chee', na' benne' ca' dxusédene' guléajle'e chee'.

¹² Gudé na' Jesús bezé'e zexíaje' xezre Capernaum, zéajle xrne'e Le' nen benne' biche' ca', ne benne' ca' dxusédene'. Na' gulezúe' na' zane' zra.

Jesús dxucá'ana chawe' chale'aj xudau'

(Mt. 21.12-13; Mr. 11.15-18; Lc. 19.45-46)

¹³ Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca' ben Dios, bebéaje' xra xrtawe' ca' lu xezr la xu Egipto.

¹⁴ Lu xezre Jerusalén blé'ene' lu chale'aj xudau' na' zaj zra' benne' dxelexutie' bezre ca', ne zrila' ca', ne bgúgudu ca', béadu ca' dxelutie' lau Dios.

Cá'anqueze blé'ene' na' benne' dxuluxuché'e dumí chee xezr zitu' ca'.

15 Gate ble'e Jesús da caní, na' bgu'e du ca' da güe'e benne' ca', na' bebéaje' ca naca benne' ca' tu zrente nen bezre chee' ca', ne zrila' chee' ca'. Na' gudxú'une' lu xula dumí chee benne' ca' dxuluxuché'e dumí, ne bdxixre' blaga' ca' chee benne' ca'.

16 Na' guzre' benne' ca' dxelexuti'e' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

17 Nadxa benne' ca' dxusede Jesús xeajlesá lazre' da naxúaj na lu xiche chee Dios, da dxenná na: Dxácatę zi' lázrdawa' lawe' da dxé'le'a gunne xue chee lizru'.

18 Nadxa judío blau ca' buluchębe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

19 Bechebe Jesús:

—Le guzría xi' xudau' nigá, na' neda', te chunna zra xechisa' na.

20 Nadxa judío ca' gulé'e Le':

—Xrupe xun iza ba zeaj dxelune' xudau' nigá, na' Lue', ¿xechisu' na chunna zraze?

21 Bchalaj Jesús chee xudau' na' da naca na bel-la' dxen chee'.

22 Chee le' na', gate bebán Jesús ládujla benne' gate, na' benne' ca' bsédene' xeajlesá lazre' ca da gunné', na' guléajle'e chee da naxúaj na lu xiche chee Dios ca naca chee Jesús, ne chee da guzre Jesús le'.

Jesús núnbe'e xúgutę bénneache

²³ Gate zua Jesús xezre Jerusalén lu Laní Pascua chee judío ca', na' benne' zan guléajle'e chee' gate belelé'ene' ca' naca xel-la' waca zren ca' da dxune'.

²⁴ Jesús quebe bde cuine' lu na' benne' ca' lawe' da nézquezne' quegá xúgute' benne' ca' dxeléajle'e chee'.

²⁵ Quebe guchínene' nu benne' xe'e Le' ca' zaj naca bēneache lawe' da nézquezne' ca' da zaj xu'u xichaj lázxdau bēneache.

3

Jesús dxuchálajle' Nicodemo

¹ Zua tu benne' xudau' fariseo le' Nicodemo. Naque' benne' blau lávela benne' judío ca'.

² Benne' nigá guxíaje' xeajnné'e Jesús chizrela, na' guzre' Le':

—Benne' Wesede, nézentu' Dios nasel-le' Lue' chee gusédenu' netu' lawe' da quebe nu benne' gaca guné' ca' zaj naca xel-la' waca zrente' da dxunu' Lue' che quebe zúale' Dios le'.

³ Nadxa Jesús guzre' le':

—Da li dxapa' lue', nu benne' quebe gálaje' xecha lasa quebe gaca gaque' tuze benne' ca' dxenná be'e Dios.

⁴ Nicodemo bchebe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e chee gálaje' xetú?

⁵ Jesús bechebe':

—Da li dxapa' lue', nu benne' quebe gálaje' ne chee nisa chee xrtizra' Dios, ne ne chee Be' Lá'azxa, quebe gaca chu'e naga dxenná bea Dios.

6 Benne' nálaje' lu ni'a lu na' bènneache, naque' bènneacheze. Nu benne' nálaje' ne chee Be' Lá'azxa, naca ban bènnea' ne chee Be' Lá'azxa.

7 Quebe xebánenu' lawe' da dxapa' lue', dxun na ba xen gálaju' xecha lasa.

8 Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca chee benne' zaj nálaje' ne chee Be' Lá'azxa. Gaca le'enu' da ba nun Be' na' lu xichaj lázxdau bènnea', na' quebe dxelé'enu' ájala dxun Be' na'.

9 Nadxa Nicodemo bchebe' Jesús:

—¿Ájazra gaca da caní?

10 Bechebe Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní?

11 Da li dxapa' lue', netu' dxuchálajntu' ca naca da nézentu', ne dxexechébentu' ca da blé'entu', na' le'e quebe dxéajle da dxentu' le'e.

12 Che quebe dxéajle chia' gate dxuchálajlena' le'e ca naca chee da dxaca lu xezr la xu nigá, ¿ájazra gaca chéajle chia' che guchálajlena' le'e chee da dxaca xabáa?

13 'Quebe ne cuen tu benne' xabáa chee lé'ene' ca dxaca na'. Tuze Bènnea' bétaje' xabáa, Bènnea' naca' neda', Benne' Gulje' Bènneache, naca' Bènnea' zúaqueze' xabáa.

14 Ca ben Moisés, bde'e tu belá' xia le'e xaga naga zua le'e xixre' lawe' lataj, cá'anqueze neda', Benne' Gulje' Bènneache, wuludá'queze' neda' tu le'e xaga,

15 chee quebe xelebía xi' nu benne' xeléajle'e chia'. Zrué'e bènnea' xel-la' nabán da zeajlí canna.

Dios dxezrí'i lazre' bénneache

16 Dios dxezrí'i lázrele'ene' bénneache, na' chee le na' bdee' Zrí'ine' tu licha' chee quebe xelebía xi' nu benne' dxeléajle'e chee'. Zrué'e bénnea' xel-la' nabán da zeajlí canna.

17 Dios gusel-le' Zrí'ine' lu xezr la xu nigá, quegá chee guzría xi'e bénneache, san chee guselé' bénneache.

18 Bénnea' dxéajle'e chee Zri'ine Dios quebe naca chee' cuía xi'e, san nu benne' quebe dxéajle'e chee' ba naca chee' cuía xi'e lawe' da quebe dxéajle'e chee Zri'ine Dios, bi tu licha' chee'.

19 Benne' ca' quebe dxeléajle'e chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledánedxené' da chul-la ca xel-la' naxaní', lawe' da dxelune' da calela.

20 Xúgute benne' dxelune' da calela dxelecuídené' xel-la' naxaní', ne quebe dxelebigue' lu xel-la' naxaní', chee quebe gaca bea da calela da dxelune'.

21 Benne' ca' dxelune' ca naca da li dxelebigue' lu xel-la' naxaní' chee gaca bea naca na chee Dios da dxelune'.

Da gunná Juan, bénnea' bchue' bénneache nisa

22 Gudé na' guxíaj Jesús naga nababa Judea nen benne' ca' dxusédené', na' guzúe' na' zane' zra nen benne' ca', dxuluchúe' bénneache nisa.

23 Cá'anqueze zua Juan lu xezr la xu chee xezre Enón da zua gáguze naga dxe' xezre Salím, dxuchúe' bénneache nisa lataj na' lawe' da déle'e na' nisa zila, na' belezrín benne' zan naga zua Juan, na' beledxúe' nisa.

24 Da nigá guca na nédxudxa gate quebe ne xelegú'e Juan lizre xia.

25 Nadxa bal-la benne' zaj de'e Juan gulezú lawe' dxulutil-le' judío ca' dizra' ca naca chee da dxucá'ana chawe na bēneache lau Dios.

26 Nadxa xeajleguezre' Juan:

—Benne' wesede, bēnea' ble'e naga zu' chalá'a xegu Jordán naga dxalaj gubizra, bēnea' bchálajlenu' netu' chee', na'a dxuchúe' bēneache nisa, na' xúgute bēneache zjácále' Le'.

27 Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'.

28 Le'e bēnquezle gunnía' neda' quebe nácaqueza' neda' Cristo, Bēnea' guchebe lazre' Dios sel-le'. Naca' tu benne' nase-la Dios chee quia lawa' lau Le'.

29 Lu laní chee wechaga na', bēnea' si'e nu'ula wechaga na' naque' benne' wechaga na', na' benne' ljwezre benne' wechaga na', bēnea' zue' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'aqueze neda' dxebéle'eda' lawe' da caní naca' ljwezre Cristo.

30 Le' dxal-la' gácadxe' szren, na' neda' dxal-la' gácadxa' cá'aze.

Ca naca chee Bēnea' za' xabáa

31 Na' gunná Juan:

—Bēnea' za' xabáa nácadxe' blau ca xúgute bēneache. Benne' naque' chee xezr la xu nigá naque' bēneacheze, ne dxuchálaje' ca naca chee da dxaca lu xezr la xu nigáze. Bēnea' ze'e xabáa nácadxe' szren ca xúgute bēneache.

32 Le' dxuchálaję' ca naca cheę da ba blé'ene', ne da ba benne' xabaala, na' quebe dxéajle' nu benne' cheę da dxenné'.

33 Che nu benne' dxéajle'e cheę', benne' nigá dxulé'ene' naca li ca da dxenná Dios.

34 Bénnea' nase-la Dios dxuchálaję' xrtizra' Dios lawe' da dxunna Dios Le' Be' Lá'azxa cheę' dute ca naque'.

35 Xradxu Dios nazrí'ine' Zrí'inequeę', ne ba bdee' lu ne'e xúgute da de.

36 Nu benne' dxéajle'e cheę Zrí'ine Dios nape' xel-la' nabán da zeajlí canna, na' benne' quebe dxuzúe' dizra' cheę Zrí'ine Dios quebe gape' xel-la' nabán caní. Wadée' lu da ba xa' da gun Dios.

4

Dxuchálajle Jesús tu nu'ula cheę tu xęzre nababa na Samaria

1 Benne' fariseo ca' belenne' zjácale benne' zandxa Jesús ca benne' zjácale' Juan, na' dxuchúa Jesús benne' zandxa nisa ca benne' dxuchúa Juan nisa.

2 Quebe dxuchúaqueze Jesús bénneache nisa. Benne' ca' dxusédene' dxuluchúe' bénneache nisa.

3 Gate guque be'e Jesús da nigá, na' bezé'e naga nababa Judea, xexíaję' naga nababa Galilea.

4 Ca xu'u Jesús neza, ben na ba xen téę' naga nababa Samaria.

5 Ca'an guca, bzrine' tu xęzre naga nababa Samaria nazí le na Sicar, da dxe' gáguze naga zua xęzr la xu na' bnezruj Jacob cheę zrí'ine', bi lebe' José.

⁶ Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran wagubizra.

⁷⁻⁸ Benne' ca' dxusede Jesús xjaque' lu xezre Sicar, xeajlegá'awe' da xelawe'. Dxácatę na' bzrin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

⁹ Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'.

¹⁰ Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenu' neda', na' neda' gunna' lue' nisa da gunna na lue' xel-la' nabán.

¹¹ Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e na situj. ¿Ájazra na' gunu' gunnu' neda' nisa chee xel-la' nabán?

¹² Xra xrtáuntu', Jacob, benne' netu' beaj nigá, naga güé'equeze le' nisa, ne naga gulé'ajqueze zrí'ine', ne be xixre' chee'. ¿Nácadxu' szrendxa ca le'?

¹³ Jesús bechebe':

—Xúgute benne' dxelé'aje' nisa chee beaj nigá welexebílequezne' nisa.

¹⁴ Nu benne' xí'aje' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

15 Nadxa nu'ula na' guzre' Le':

—Benne', benna neda' nisa na', chee québedxa gun na ba xen xida' nigá xedajxrí'a nisa.

16 Na' Jesús guzre' nu'ula na':

—Guxíaj xeajnné benne' chiu', na' xídale nigá.

17 Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu',

18 lawe' da ba guzúalenu' gazxu' benne', na' bēnea' zúalenu' na'a quebe naque' benne' chiu'. Ca naca da nigá gunnáu' da li.

19 Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee Dios.

20 Xra xrtáuntu' ca' bulucá'ana szrene' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

21 Na' bechebe Jesús:

—Guxéajle chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén.

22 Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'.

23 Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xelune' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szren bēneache Le' caní.

24 Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne chee Be' Lá'azxa, ne ne chee da li.

25 Na' nu'ula na' guzre' Le':

—Neda' nezda' walá' benne' Mesías (da zéaję na Cristo), na' gate la' Le', na' guzėjni'ine' dxi'u ca naca xúgute.

26 Jesús guzre' le':

—Neda' naca' Bénnea', dxuchálajęna' lue'.

27 Ca gunné' ca', na' belexezrín benne' ca' dxusedene', na' belexebánene' lawe' da dxuchálaję Jesús tu nu'ula Netúe' quebe bexázejene' guchebe' Le' bi da dxaca lazre', u bizra cheę dxuchálajęne' nu'ula na'.

28 Nadxa nu'ula na' bca'ane' dxe'e chee' dxu'a beaj na', na' bezé'e zexíaje' xezre na' naga xeajezre' benne' ca':

29 —Le da lé'ele tu benne' guzre' neda' xúgute da ba bena'. ¿Quegá benne' nigá Cristo, Bénnea' sel-la Dios?

30 Nadxa beledxúaj benne' ca' xezre na', zjaque' naga zua Jesús.

31 Dxácatę na', benne' ca' dxusede Jesús gulata' xuene' Le', gulenné':

—Benne' Wesęde, gudagu late'.

32 Jesús guzre' benne' ca':

—De da dxawa', da quebe núnbeale le'e.

33 Nadxa benne' ca' dxusede Jesús gulezú lawe' dxuluchebe ljwezre', dxelenné':

—¿Núteca bedajgú'e da gudawe'?

34 Jesús guzre' le':

—Xela wagu chia' naca na chee guna' da dxaca lazre' Xra', Bénnea' nasel-le' neda', ne chee gusex-uzra' guna' zrin chee'.

³⁵ Le'e dxennale: “Xetapa beu' xelápadxu.” Neda' dxapa' le'e, le nna' bénneache zaj naque' ca tu lina, da bache naca na xelápadxu.

³⁶ Benne' dxelape' dxezi'e lazruj chee', na' da dxelape' naca na chee xelapa bénneache xel-la' nabán da zeajlí canna, chee sua xel-la' dxebé benne' dxaza tu zren nen benne' ca' dxelelape'.

³⁷ Da li naca ca da dxelenná bénneache: Tu benne' dxaze', na' xetúe' dxelape'.

³⁸ Neda' gusel-la' le'e xelápale naga quebe gúzale. Ca' naca na, benne' xula belune' zrin gulaze', na' le'e dxezile ba neza zrin da belún benne' ca'.

³⁹ Benne' zan, benne' xezre na' naga nababa Samaria, guléajle'e chee Jesús ne chee xrtizra' nu'ula na', gunné': “Guzre' neda' xúgute da ba bēna'.”

⁴⁰ Gate belelá' benne' Samaria ca' naga zua Jesús, na' gulata' xuene' Le' xegá'ane' nen le', na' begá'ane' na' chupa zra.

⁴¹ Benne' zandxa guléajle'e chee Jesús gate belenne' ca da dxenná Le'.

⁴² Nadxa gulé'e nu'ula na':

—Na'a dxéajlentu' chee' quegá tuze ne chee da guzru' lue' netu', na' cá'aqueze lawe' da bénquezentu' netu' chee', na' nézentu' da li naque' Cristo, Bénnea' guselé' ca naca bénneache.

Jesús dxexune' zri'ine tu benne' wen zrin blau chee xu'u lawe'

43 Gudé chupa zra bezá' Jesús xezre ca' zaj nababa Samaria, na' guzé'e zéaje' naga nababa Galilea.

44 Guxíaje' na' lawe' da gunnáqueze Jesús, gunné': "Tu benne' dxuchalaje' waláz chee Dios, quebe dxelapa benne' lazrie' le' ba lá'ana."

45 Gate bezrine' naga nababa Galilea, benne' zaj zre'e na' belezí' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belelé'ene' xúgute da ben Jesús lu laní na'.

46 Nadxa bezrín Jesús xezre Caná naga nababa Galilea naga bene' bexaca nisa xrise uva wal-la. Zua lu xezre Capernaum tu benne' wen zrin blau chee xu'u lawe', zua tu zrí'ine' bi biu quebe chawe' zúabe'.

47 Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíaje' xeajnné'e Jesús, na' gutá' xuene' Le' chéaje' lizre' xexune' bi biu chee', bi na' ba zua gátebe'.

48 Nadxa Jesús guzre' le':

—Le'e quebe chéajlele chia' che quebe lé'ele xella' waca chee xabáa da dxulé'eda'.

49 Benne' wen zrin blau na' gunné':

—Xran, gudázega na'a quebe ne gate zri'ina'.

50 Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajle'e chee da guzre Jesús lé', na' bezé'e zexíaje'.

51 Gate ba zua xezrine' lizre', na' benne' wen zrin chee' xeajlexezrígale' le', na' gulé'e le':

—Naca ban zri'inu'.

52 Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

53 Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xúgute benne' zaj zra' lizre' guléajle'e chee Jesús.

54 Da nigá naca na xel-la' waca zren da gudxupe' da ben Jesús gate bezrine' naga nababa Galilea.

5

Jesús dxexune' tu benne' biu naga nazí le na Betesda

1 Ca gudé na' guxú'u tu laní chee judío ca', na' bezrín Jesús xezre Jerusalén.

2 Lu xezre na', gáguze naga zua dxa xu'u chee xezre da nazí le na Dxa Xu'u Chee Zrila' Ca', dxe' tu cue'la nisa nazí le na Betesda lú dizra' hebreo, na' dxu'a nisa na' zaj nnita gazxu' lachila.

3 Lachila ca' zaj de benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinnaj ca'. Dxelebeze' ca bixre nisa na'.

4 Ca'an naca lawe' da dxetaj tu gubáz chee xabáa bata gala, ne dxunibe' nisa na', na' benne' nedxu dxeajchu'e lu nisa na' ca dxedé dxunibe' na, dxexaque' chee bíteteze xel-la' we' xu'e.

5 Zua tu benne' na' ba guca chinu chunne dxua iza xu'e we'.

6 Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

7 Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxebixre na. Tu tu lasa gate dxaca lazra' chu'a, benne' xula dxu'e nédxudxa.

⁸ Jesús guzre' le':

—¡Guxasa! Becá'a da'a chiu', ne bexíaj.

⁹ La' ná'queze bexaca benne' we' na', na' bequé'e da'a chee', ne guzú lawe' dxedé'. Zra na' naca zra dxulupá'ana judío ca',

¹⁰ na' benne' judío ca' gulé'e bénnea' bexaque':

—Na'a naca na zra dxupá'anadxu. Quebe naca na gu'u da'a chiu'.

¹¹ Na' benne' na' bechebe':

—Bénnea' bexune' neda' guzre' neda': “Becá'a da'a chiu', ne bexíaj.”

¹² Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj?

¹³ Benne' na' quebe nézene' nu bénnea' bexune' le' lawe' da ba zexíaj Jesús lávela benne' zan ca' zāj zre'e na'.

¹⁴ Ca gudé na' Jesús bezrague' bénnea', dxedé' chale'aj xudau', na' guzre' le':

—¡Gunná'xque! Ba bexacu' na'a. Québedxa gunu' dul-la, chee' quebe bi sacu' xetú da wál-ladxa.

¹⁵ Nadxa benne' na' bezé'e zexíaje', na' bzenne' judío ca' bexún Jesús le'.

¹⁶ Chee' le' na' benne' judío ca' guláu zi' xuzre' Jesús, ne gulaca lazre' xelúti'e' Le' lawe' da dxune' da caní lu zra dxulupá'ane'.

¹⁷ Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

18 Chee le na' benne' judío ca' gulaca lázredxe' xelútię' Jesús lawe' da quegá tuze dxuzúę' chalá'ala da nadxixruj bea na chee zra dxulupá'ane', na' cá'anqueze dxun cuine' ca Dios gate gunné' Dios nácaqueze' Xre'.

Xel-la' dxenná bea da napa Zri'ine Dios

19 Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dx-elé'eda' dxun Xra'. Xúgute da dxun Xra', cá'anqueze dxuna' neda', Zrí'ine'.

20 Dios, Xra', nazrí'ine' neda', Zrí'ine', ne dxulé'ene' neda' xúgute da dxúnqueze' Le', na' gulé'ene' neda' da zaj nácadxa szren ca da ca' dxuna', na' xebánequezle le'e ca xelaca na.

21 Ca dxun Xradxu Dios, dxusebane' benne' gate, ne dxuxunézruje' xel-la' nabán chee', cá'anqueze neda', Zrí'ine', dxuxunézruja' xel-la' nabán chee' benne' ca' dxaca lazra' xunézruja' na.

22 Xradxu Dios quebe dxuchi'e nu benne', san ba benne' neda', Zrí'ine', xel-la' dxenná bea guchi'a da dxelún tu tu bénneache,

23 chee xelapa xúgute benne' neda', Zrí'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zrí'ine', cá'anqueze quebe dxape' ba lá'ana Xradxu Dios nasel-le' neda'.

24 'Da li dxapa' le'e, benne' dxenne' da dxennéa' neda', ne dxéajle'e chee Dios nasel-le' neda', benne' nigá nape' xel-la' nabán da zeajlí canna, na' quebe cuía xi'e lawe' da ba bedxúaje' lu na' xel-la' gute, ne ba zue' lu xel-la' nabán.

²⁵ Da li dxapa' le'e, wazrín zra, ne ba dxezrín zra na' gate benne' gate ca' xelenne' chi'a neda', Zri'ine Dios, na' benne' xuluzúa xrtizra' welaca bánqueze'.

²⁶ Xráqueza' nape' xel-la' dxenná bea xunézruje' xel-la' nabán da naca na li lazre' chee Bénneache, ne cá'anqueze ba benne' neda', Zrí'ine', xel-la' dxenná bea xunézruja' Bénneache xel-la' nabán caní,

²⁷ ne ba benne' neda' xel-la' dxenná bea guchi'a chee Bénneache lawe' da naca' Benne' Gulje' Bénneache.

²⁸ Quebe xebánele chee da nigá lawe' da zrin zra gate xúgute benne' gate xelenne' chi'a

²⁹ xelexedxúaje' lu xedxu ba. Benne' ca' belune' da xrlátaje xelexebane' chee xelape' xel-la' nabán da zeajlí canna. Benne' ca' belune' da calela xelexebane' chee xelebía xi'e.

Da dxelunna bea na napa Jesús xel-la' dxenná bea

³⁰ Na' gunná Jesús:

—Neda' quebe bi gaca guna' cheézqueza'. Neda' dxuchi'a chee Bénneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasele' neda'.

³¹ Che neda' dxexecheba' da nácaze cheéqueza', da dxennéa' quebe naca na da dxunna bea na.

³² Zua tu benne' xula dxexechebe' da nácaqueze chia', na' da dxenné' naca na da dxunna bea na.

³³ Le'e gusel-lale benne' xeajlechebe' Juan, na' ca da bechebe' naca na da li.

³⁴ Da dxunna bea na da dxuxrén lazra' neda' quebe naca na chee Bénneacheze. Dxapa' le'e da nigá chee lale le'e.

35 Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'.

36 Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebaga Xra' neda' dxuna'. Da caní dxelunna bea na da li Dios, Xra', gusél-le' neda'.

37 Cá'anqueze Xra' nasele-le' neda' dxexechebe' chia'. Lácala ba bchalaj Le', le'e quebe ne xénele chí'e, ne quebe ne lé'ele Le',

38 ne quebe nuzúale dizra' chee' xichaj lázrdaule lawe' da quebe dxéajlele chia' neda', nasele-la Xra' neda'.

39 Le'e dxusédele du lázrele da naxúaj na lu xiche chee' Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee' Dios dxuchalaj na ca naca chia' neda'.

40 Le'e quebe dxaca lázrele xídale naga zua' neda' chee' gápale xel-la' nabán na'.

41 'Neda' quebe dxezi'a xel-la' ba lá'ana ca da dxelunna bénneache, da quebe naca na li lazre'.

42 Neda' númbe'a le'e, ne nezda' quebe nazrí'ile Dios.

43 Bla'a neda' waláz chee' Dios, Xra', na' le'e quebe dxezí' lu na'le neda'. Che za' tu benne' lu da naca cheézqueze', benne' na' wazí' lu na'le.

44 ¿Ájazra gaca chéajlele le'e chia' che dxunle zrin chee' xelapa ljwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'?

45 Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e.

⁴⁶ Che da li guxéajlele le'e chee da gunná Moisés, cá'anqueze chéajlele chia' neda' lawe' da bzuaj Moisés ca naca chia' neda'.

⁴⁷ Na'a, che quebe dxéajlele chee da bzuaj le', ¿ájazra gaca chéajlele chee da dxapa' le'e?

6

Jesús dxugawe' chi xun gaxúa benne' biu

(Mt. 14.13-21; Mr. 6.30-44; Lc. 9.10-17)

¹ Ca gudé na' guxíaj Jesús xecha la'a dxu'a nísadau' chee Galilea, da nazíqueze le na nísadau' chee Tiberias.

² Benne' zante zjácálene' Jesús lawe' da ba belelé'ene' xel-la' waca zren ca' da dxun Le', dxex-une' benne' we' ca'.

³ Nadxa Jesús guluéne' tu lu xi'a, na' gudxé'e na' nen benne' ca' dxusédene'.

⁴ Ba zua gagu Laní Pascua chee judío ca'.

⁵ Gate ble'e Jesús benne' zan ca' zá'aque' zeaj nawe' Le', na' guzre' Felipe:

—¿Gazra cheajxridxu da xelagu benne' zan caní?

⁶ Gunná caní Jesús chee la' bi nna Felipe, lawe' da ba neze Jesús ca da guné'.

⁷ Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelezí' benne' caní late' weaj.

⁸ Nadxa Andrés, xetú benne' ca' dxuséde Jesús, ne naque' bi biche Simón Pedro, guzre' Jesús:

⁹ —Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ájazra gun da nigá gueque na chee xúgute' benne' caní?

¹⁰ Nadxa gunná Jesús:

—Le xe xúgute' xelebé'e.

Naca lu daca lataj na', na' gulebé' ca du chi xun gaxúa benne' biu.

¹¹ Nadxa gucá'a Jesús xeta xtila ca', na' ca gudé guzre' Dios “Xcalenu”, bnézruje' na benne' ca' dxusédene', na' benne' caní gulísie' na láwele benne' zan ca' zaj dxé'e na'. Cá'anqueze ben Jesús chee bela ca', na' bnézruje' ca da gulaca lazre' benne' ca'.

¹² Gate gulélaje benne' ca', na' Jesús guzre' benne' ca' dxusédene':

—Le xutupa da bízrujdu ca' da dxexegá'ana na, chee quebe bi gaca dítaje.

¹³ Belexequé'e na, na' buluzré'e chazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'.

¹⁴ Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' bénnea' guchálaje' waláz chee Dios, bénnea' dxal-la' le'e.

¹⁵ Guque bé'ene' Jesús dxelaca lazre' xeleché'e Le' xadía chee xuluzú'e Le' ca benne' wenná bea, na' bezé'e na', ne begüéne' lu xi'a sibe na' chee sue' leze'.

Jesús dxedé' lawe' nísadau'
(Mt. 14.22-27; Mr. 6.45-52)

¹⁶ Gate ba za xrinne, benne' ca' dxusede Jesús belétaje' dxu'a nísadau',

¹⁷ na' gulu'e lu da dxedá lawe' nísadau', ne gulezú lawe' zjaque' xeledé'e xechalá'a nísadau' chee xezezrine' xezre Capernaum. Ca guxrinne, quebe ne xezrín Jesús na'.

18 Nadxa guzú lau dxaca tu be' bdunu' lawe' nísadau' na', na' xeajxruza chee nísadau' na' guxásale'e na.

19 Gate ba guledé'e lu nísadau' na' catite sadxu tu chi'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'.

20 Nadxa Jesús guzre' benne' ca':

—Neda' na'. Quebe zrébele.

21 Nadxa lu dute xel-la' dxelebé gulezí' lu ne'e Le' lu da dxedá lawe' nísadau' na', na' chadite belezrine' lu xezr la xu naga zjaque'.

Benne' zan ca' dxelexilaje' Jesús

22 Zra xula benne' zan ca', benne' belexegá'ana xecha la'a nísadau', guleque bé'ene' ba zeajxaca benne' ca' dxusede Jesús lu da dxedá lawe' nísadau' tu licha' da dxe' chalá'a na', na' Jesús quebe guxíajlene' benne' ca'.

23 Dxácate na' xezícala da dxeledá lawe' nísadau', da ca' beledxúaj na xezre Tiberias, belezrín na tu lataj da zua gáguze naga gulawe' xeta xtila na' ca gudé guzre Xránadxu Dios: "Xcalenu'."

24 Chee le na' gate benne' zan ca' guleque bé'ene' québedxa zua Jesús na', ne cá'anqueze benne' ca' dxusedene', na' gulu'e lu da dxeledá lawe' nísadau', ne xjaque' xezre Capernaum zeajlexedilaje' Jesús.

Jesús naque' xeta xtila da dxunna na xel-la' nabán li lazre'

25 Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchebe' Le':

—Benne' Wesede, ¿bata bla'u nigá?

²⁶ Jesús guzre' benne' ca':

—Da li dxapa' le'e, dxexílajle le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e.

²⁷ Quebe cue'le gunne xue sile da gágule da te chee na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bénneache, le'e, lawe' da bzua Xra' Dios nen neda' da dxunna bea na naca' Zrí'ine'.

²⁸ Nadxa buluchebe' Le':

—¿Bi dxal-la' guntu' chee gaca ca da dxaca lazre' Dios guntu'?

²⁹ Jesús bechebe':

—Da dxaca lazre' Dios gunle naca na chéajlele chia' neda', naca' Bénnea' gusel-la Dios.

³⁰ Nadxa buluchebe' Le':

—¿Bizra xel-la' waca gunu' chee le'entu' na, na' chéajlentu' chiu'? ¿Bizra dxunu'?

³¹ Xra xrtauntu' ca' gulawe' xeta maná le'e xixre' lawe' lataj, ca naxúaj na lu xiche chee Dios, dxenná na: Dios bgawe' benne' ca' xeta xtila da za xabáa.

³² Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'.

³³ Xeta xtila na' da dxunna Dios le'e naca na Bénnea' bétaje' xabáa, ne dxunézruje' chee bénneache xel-la' nabán li lazre'.

³⁴ Nadxa benne' ca' gulé'e Le':

—Xran, tu bénnazqueze cheentu' xeta xtila caní.

³⁵ Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tune', na' benne' chéajle'e chia' cabátadxa bílene'.

³⁶ Naca na ca ba gucha' le'e. Le'e na' quebe dxéajlele chia', lácala ba ble'ele neda'.

³⁷ Xúgute benne' ca' dxunna Xra' neda', xeलेlé'e lawa', na' benne' ca' xeलेlé'e naga zua', quebe guzúa' benne' ca' chalá'ala.

³⁸ Neda' guzá'a xabáa, quegá chee guna' ca dxaca lázrequeza' neda'. Bla'a chee guna' ca da dxaca lazre' Xra', gusel-le' neda'.

³⁹ Da dxaca lazre' Xra', nasel-le' neda', naca na chee quebe gunitia' netú benne' ca' ba benne' chia'. Nacan chee gusebana' benne' ca' lu zra bzebe.

⁴⁰ Da dxaca lazre' Xra', nasel-le' neda', naca na chee xelapa bènneache xel-la' nabán da zeajlí canna, xúgute benne' ca' xeलेné'e neda', Zri'ine Dios, ne xeलेajle'e chia' neda', na' chee gusebana' neda' benne' ca' lu zra bzebe na'.

⁴¹ Gate belenne' da nigá, na' judío ca' gulezú lawe' dxelezí tizre' Jesús lawe' da gunné': "Neda' naca' xeta xtila da betaj xabáa."

⁴² Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'e. ¿Bizr chee na' dxenné' bétaje' xabáa?

⁴³ Nadxa Jesús guzre' benne' ca':

—Québedxa si tízrale.

⁴⁴ Quebe nu benne' gaca xide' naga zua' neda', che quebe xedajgúa Xra' nasel-le' neda' bènnea', na' neda' gusebana' bènnea' lu zra bzebe na'.

⁴⁵ Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusedene' xúgute bēneache. Ca' gaca na, xúgute benne' ca' dxuluzé nague' ca da dxusede Xra', dxelelé'e naga zua'.

⁴⁶ 'Quebe ne le'e nu benne' Xra'. Benne' tu licha', bēnea' blé'ene' Le', naca bēnea' guzé'e naga zua Dios.

⁴⁷ Da li dxapa' le'e, nu benne' dxéajle'e chia' neda' nape' xel-la' nabán da zeajlí canna.

⁴⁸ Neda' naca' xeta xtila da dxunna na xel-la' nabán li lazre'.

⁴⁹ Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gulate'e'.

⁵⁰ Xeta xtila nigá naca na da za xabáa, na' che nu benne' gawe' na, quebe gatie' tu chi'ize.

⁵¹ Néda'queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bánqueze' chadía chacanna. Xeta xtila na' da dxunna' neda' naca na bēla' dxen cheézqueza', da gunna' chee xelaca bánqueze bēneache.

⁵² Nadxa benne' judío ca' gulezú lawe' dxuluchebe ljwezre', dxelelé'e':

—¿Ájazra gun benne' nigá, gunne' dxi'u bēla' dxen cheézqueze' chee gágudxu na?

⁵³ Jesús guzre' benne' ca':

—Da li dxapa' le'e, che le'e quebe gágule bēla' dxen chia' neda', Benne' Gulje' Bēneache, ne che quebe xí'ajle dxen chia', quebe gápale xel-la' nabán li lazre'.

⁵⁴ Benne' dxawe' bēla' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bēnea' lu zra bzebe na'.

55 Bēla' dxen chia' naca na xel-la' wagu li lazre' chee bēne'du xu'ule, na' dxen chia' naca na da xe'le'aj bēneache da naca na li lazre'.

56 Benne' dxawē' bēla' dxen chia', ne dxí'aje' dxen chia', naque' neda' tuze, na' néda'queza' naca' bēnea' tuze.

57 Xra' nasele' neda' xu'u lu ne'e xel-la' nabán li lazre', na' neda' naca bana' ne chee Le'. Cá'aqueze bēnea' dxawē' da naca chia' neda' gaca bánqueze' ne chia' neda'.

58 Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawē' xeta xtila nigá waca bánqueze' chadía chacanna.

59 Bsede Jesús ca naca da caní naga zaj zra' benne' zan ca' lu xu'u naga dxelezraga bēneache chee xezre Capernaum.

Ca naca dizra' na' da dxunna na xel-la' nabán da zeajlí canna

60 Gate belén benne' zan ca' da nigá dxusede Jesús, na' benne' ca' zjácate Jesús gulenné':

—Dizra' caní dxenná Jesús zaj nácale'e na stebe sidxu. ¿Nuzra gaca gun caní?

61 Guque bé'ene' Jesús dxelenné' chee xrtizre', na' bchebe' benne' ca':

—¿Dxuzúa dizra' nigá le'e stebe?

62 ¿Ájazra gunle checa' lé'ele neda', Benne' Gulje' Bēneache, xegüéna' xabáa naga zua' nédxute'?

63 Be' naca na da dxunna xel-la' nabán li lazre'. Da naca na bēla' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'.

64 Bál-lale le'e quebe dxéajle chia'.

Caní gunná Jesús lawe' da nézene' nédxudautē nu benne' ca' quebe dxeléajle'e chee', ne nua' gudé Le' lu na' benne' guledábague' Le'.

65 Nadxa gunná Jesús:

—Chee le na' gucha' le'e, quebe nu benne' gaca xide' naga zua' neda' che quebe xedajgúa Xra' bēnea'.

66 Lu zra ná'queze benne' zan ca', benne' xjácāle' Jesús, québedxa xjácāle' Le'.

67 Nadxa Jesús bchebe' benne' chazrinnu ca' dxusédene', gunné':

—¿Cá'anqueze le'e dxaca lázrele xexíajle?

68 Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna.

69 Netu' dxéajlentu' chiu', ne nézentu' nacu' Cristo, Zri'ine Dios ban.

70 Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

71 Da nigá gunná Jesús, bchálaje' ca naca chee Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábague' Le'. Naque' tu benne' chazrinnu ca' dxusede Jesús.

7

Benne' biche Jesús quebe dxeléajle'e chee'

¹ Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío blau zaj zre'e na' xelútiē' Le'.

² Ba za laní gate judío ca' dxelezúē' lu xu'u laga' ca'.

3 Chee le na' bi biche Jesús gulé'e Le':

—Quebe xegá'anu' nigáze. Bexíaj Judea, chee cá'anqueze benne' ca' dxeléajle chiu' zaj zre'e na' gaca xeelé'ene' ca da dxunu'.

4 Che nu benne' dxaca lazre' xelúnbe'e bénneache le', quebe dxune' da ca' bagácheze. Lawe' da dxunu' Lue' da caní, ben na lau xúgute bénneache.

5 Caní gulenné' lawe' da quebe dxeléajle benne' biche' ca' chee Jesús.

6 Nadxa Jesús guzre' benne' ca':

—Quebe ne zrin zra cha'a na'. Chee le'e bíteteze zra waca chéajle.

7 Benne' ca' zaj naca chee xezr la xu nigá quebe gaca xelecuídené' le'e. Dxelecuídené' neda' lawe' da dxulé'eda' neda' naca da calela da dxelún benne' ca'.

8 Le chjaca le'e laní na'. Quebe sa'a neda' na'a lawe' da quebe ne zrin zra cha'a.

9 Ca gudé guzre Jesús benne' ca' da nigá, na' begá'ane' naga nababa Galilea na'.

Jesús dxezrine' laní gate judío ca' dxelezúe' xu'u laga' ca'

10 Ca gudé besiá'aca benne' biche Jesús, na' cá'anqueze Le' guxíaje' laní na'. Bagácheze guxíaje' chee quebe nu le'e Le'.

11 Benne' xíchaje chee judío ca' belexílaje' Jesús lu laní na'. Dxelenné':

—¿Gazra zua bénnea'?

12 Ládujla benne' zan ca', benne' zan buluchálaje' ca naca chee Jesús. Bal-le' gulenné': “Naque' benne' xrlátaje.” Xebal-le' gulenné': “Quebe naque' xrlátaje lawe' da dxezí xe'e bénneache.”

13 Quebe nu benne' bchálaje' caníqueze ca naca chee' lawe' da dxelezrebe' da xelún benne' xíchaje ca' chee judío ca'.

14 Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédene' benne' zaj zre'e na'.

15 Belexebane benne' judío ca', dxelenné':

—¿Ájazra na' benne' nigá da zante nézene', ne quebe bsédie' chee xudau'?

16 Bechebe Jesús:

—Da dxusédeda' neda' le'e quebe naca na cheézqueza'. Naca na chee Xra' nasele' neda'.

17 Che nu benne' dxaca lazre' guné' ca da dxaca lazre' Dios, na' wanézene' che da dxusédeda' naca na chee Dios, u che dxennéa' ca da naca cheézqueza'.

18 Benne' dxuchálaje' da naca cheézqueze' dxune' na chee xelapa bènneache le' ba lá'ana. Bénnea' dxue lazre' xelapa bènneache ba lá'ana bènnea' gusel-le' le', benne' nigá dxenné' da li, ne quebe bi dxenné' da naca na da wen lazre'.

19 'Moisésqueze benne' le'e da nadxixruj bea na, na' netule le'e quebe dxuzúale dizra' chee da nadxixruj bea na na'. ¿Bizr chee na' dxaca lázrele gútele neda'?

20 Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

21 Jesús guzre' benne' ca':

—Tu xel-la' waca bēna' lu zra dxupá'anale, na' xúgutele le'e dxebénele.

22 Moisés benne' da zéajlele, dxechúgule late' weaj bēla' chee bēl-la' dxen chee zrí'inele bi biudu

ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'ante. Chee le na' le'e dxechúgule late' bela' chee bel-la' dxen chee tu bi biúdau' chee xegá'anabe' xrlátaje lau Dios lácala naca zra dxupá'anale.

²³ Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' dute bel-la' dxen chee tu benne' gate naca zra dxupá'anale?

²⁴ Quebe guchí'ale le'e chee tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaje.

Jesús dxuchálaje' chee naga ze'e

²⁵ Nadxa bal-la benne' ca' zaj zre'e Jerusalén gulezú lawe' dxuluchebe ljwezre':

—¿Quegá benne' nigá bénnea' dxelexílaje' chee xelútię' le'?

²⁶ Nigá zue' dxuchálaje' lávela bénneache, na' quebe nu bi dxę Le'. ¿Zaj neze benne' xíchaje' ca' da li naca benne' nigá Cristo, Bénnea' nasel-la Dios?

²⁷ Netu' nézentu' ga za' benne' nigá. Gate xida Cristo, quegá nu neze ga ze'e.

²⁸ Jesús zue' dxusédene' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bénnea' nasel-le' neda' naque' li lazre', na' Bénnea' quebe núnbeale le'e.

²⁹ Neda' núnbe'a Le' lawe' da za'a naga zua Le', na' Le' gusél-le' neda'.

³⁰ Nadxa gulaca lazre' xe_lle_l-le' Jesús. Quebe nu gudela Le' lawe' da quebe ne zrin zra chee xelútie' Le'.

³¹ Benne' zan guléajle'e chee Jesús, na' gulenné':
—Gate xida Cristo, ¿gúnljadxé' xel-la' waca zrente ca da dxun benne' nigá?

Benne' fariseo ca' dxelesel-le' xra'aga wen zrin chee' chee xelel-le' Jesús

³² Benne' fariseo ca' belenne' ca da dxelenná bēneache ca naca chee Jesús, na' le', ne benne' xíchaje ca' chee bxruze ca' gulesel-le' xra'aga wen zrin chee xudau' chee xelel-le' Jesús.

³³ Nadxa gunná Jesús:
—Wazúalēna' le'e xetú chí'idau', na' xezrínqueza' naga zua Bēne' gusél-le' neda'.

³⁴ Le'e wexílajle neda', na' quebe xezrélele neda', lawe' da quebe gaca sa'le naga sua' neda'.

³⁵ Nadxa benne' judío ca' gulezú lawe' dxuluchebe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíaje' naga zaj zra' benne' judío ca' zaj nase dinnaje' ládujla benne' xezr la xu ca' chee gusédenē' benne' quebe zaj naque' judío?

³⁶ ¿Bizra zéaje da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

Jesús dxuchálaje' chee xegu nisa da dxunna xel-la' nabán li lazre'

³⁷ Zra bzebe chee laní na' naca na zra blaudxa. Lu zra na' guzé Jesús, na' gunné' zizraj:

—Che nu benne' dxebílene', dxal-la' xide' naga zua' neda', na' xí'aje'.

38 Naca na ca naxúaj na lu xiche chee̅ Dios, dxenné': "Benne' dxéajle'e chia', lu lázrdawe' galaj xegu nisa da gunna na xel-la' nabán."

39 Da nigá gunná Jesús ca naca chee̅ Be' Lá'azxa, Bénnea' xezezi' benne' ca' xeléajle'e chee̅ Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

Bénneache dxelaque' chupa la'a

40 Bal-la bénneache, gate belenne' da nigá, gulenné':

—Da li benne' nigá naque' Bénnea' guchalaje' waláz chee̅ Dios, Bénnea' dxal-la' xide'.

41 Xebal-le' gulenné':

—Benne' nigá naque' Cristo, Benne' guchebe lazre' Dios sel-le'.

Xebal-le' gulenné':

—¿Waca Cristo benne' Galilea?

42 Lu da naxúaj na lu xiche chee̅ Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

43 Ca'an guca, gulaca benne' ca' chupa la'a ne chee̅ Jesús.

44 Bal-le' gulaca lazre' xel-le' Jesús, na' quebe nu bexazre guné' na.

Benne' xíchaje ca' chee̅ judío ca' quebe dxeléajle'e chee̅ Jesús

45 Xra'aga wen zrin ca' chee̅ xudau' belexezrine' naga zaj zra' fariseo ca', ne benne' xíchaje ca' chee̅ bxruze ca', na' benne' caníbuluchebe' xra'aga wen zrin ca':

—¿Bizr chee̅ na' quebe guchele bénnea'?

46 Belexechebe xra'aga wen zrin ca':

—Quebe ne guchalaj nu bēnneache ca dxuchalaj benne' nigá.

⁴⁷ Nadxa fariseo ca' gulé'ē xra'aga wēn zrin ca':

—¿Cá'anqueze le'e beḷe lataj guzī xē'ē le'e?

⁴⁸ Quebe nu ne chéajḷe chee bēnnea', benne' xíchajē caní, ne cá'anqueze benne' fariseo ca'.

⁴⁹ Benne' ca' dxeléajḷe'ē chee bēnnea' quebe zaj núnbe'ē da nadxixruj bea na, ne zaj nabía xi'ē.

⁵⁰ Nicodemo, bēnnea' guxíajē' xejnné'ē Jesús chizrela naque' tu benne' fariseo ca', na' guzre' benne' ca':

⁵¹ —Cateze dxenná da nadxixruj bea cheedxu quebe gaca guzría xidxu tu benne' che quebe ne xénedxu xechēbe' chee nézedxu che bi da nabague'ē.

⁵² Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalajē' waláz chee Dios quebe ne gálajē' naga nababa Galilea, naga zaj zra' bēnneache quebe zaj naca xánnie' judío.

⁵³ Nadxa tu tu benne' ca' xejxaque' lizre'.

8

¹ Na' Jesús guzé'ē zéajē' lu Xi'a Xaga Olivo.

Jesús dxuchálajḷe' tu nu'ula dxunē' dul-la dxíchajē' xrba chee xel-la' nuchaga na'

² Zra xula, gate guxaní', na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'ē, ne guzú lawē' dxusédenē' benne' ca'.

³ Nadxa benne' ca' dxuluxuzájḷe'ē da nadxixruj bea Dios, ne benne' fariseo ca' guleché'ē tu

nu'ula naga zua Jesús, belelé'ene' le' dxune' dul-la dxíchajē' xrba chee xel-la' nuchaga na'. Buluzé' nu'ula na' laduj benne' zaj zre'e na',

⁴ na' gulé'e Jesús:

—Benne' Wesede, nu'ula nigá blé'entu' le' dxune' dul-la dxíchajē' xrba chee xel-la' nuchaga na'.

⁵ Da bdxixruj be'e Moisés dxenná be'e netu' gütentu' nu'ula caní, güentu' le' xiaj. ¿Bizra dxennáu' Lue'?

⁶ Caní gulenná benne' ca' chee xuludxixre' Jesús chee xelezéquene' xelagu zria Le'. Nadxa gudxé' luche Jesús, ne guzú lawe' dxuzúajē' lu xu nen zrube ne'e.

⁷ Benne' ca' buluchébequeze' Jesús, na' Le' bezé' dxē'e benne' ca':

—Nútetezla le'e quebe nabágale dul-la, waca su laule güele nu'ula nigá xiaj.

⁸ Na' bebé' luche Jesús, ne bzúajqueze' lu xu.

⁹ Benne' ca', gate belenne' da nigá, quebe bzua xichaj lázrdawē' le' zrize, na' belexedxúajē' tu weajē'. Belexedxúaj za'a benne' gúladxá, na' ca belexedxúaj xúgute benne' ca' dxelagu zriē' nu'ula', na' begá'ana Jesús tuze' nen nu'ula na', ze' laduj benne' ca' dxuluzé' nague' chee'.

¹⁰ Nadxa bezé' Jesús, ne gate québedxa nu benne' ca' ble'e Jesús, benne' dxulagu zriē' nu'ula na', nadxa guzre' le':

—Nu'ula, ¿gazra na' benne' ca' gulagu zriē' lue'? ¿Quebe nu chilá' benne' guzría xi'e lue'?

¹¹ Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

Jesús dxusení'ē lu xichaj lázxdau bēnneache

¹² Bchálajlē Jesús benne' ca' xecha lasa, gunné':

—Neda' naca' xel-la' naxaní' cheē lu xichaj lázxdau bēnneache. Benne' dxedálenē' neda' gape' xel-la' naxaní' nigá da gunezruj na lē' xel-la' nabán li lazre', na' cabata' tadxe' lu da chul-la cheē dul-la da zaj nabague'.

¹³ Nadxa benne' fariseo ca' gulé'ē Le':

—Lue' dxexechebu' cheézquezu', na' da dxexechebu' quebe bi zaca na.

¹⁴ Bechebe Jesús:

—Da dxexecheba' zaca na lácala néda'queza' dxexecheba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a.

¹⁵ Le'e dxuchi'ale cáteze dxenná xichaj lázrdaule. Bla'a neda', quegá cheē guchi'a ca da dxun nu benne'.

¹⁶ Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasel-lē' neda' dxuchi'e tu zren nen neda' ca naca da dxelún bēnneache.

¹⁷ Lu da nadxixruj bea cheēle le'e naxúaj gate zaj zra' chupa benne' dxexechebe' tuz ca dxelenné', naca da li xrtizra' benne' ca'.

¹⁸ Néda'queza' dxexecheba' da naca cheézqueza', na' Xra' nasel-lē' neda', cá'anqueze dxexechebe' chia'.

¹⁹ Nadxa benne' ca' buluchebe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

²⁰ Da caní bchalaj Jesús dxácatē na' dxusédene' bēnneache chale'aj xudau' naga zaj nnita xi'ina dumí chee xudau'. Quebe nu gudēla Le' lawe' da quebe ne zrin zra chee'.

Dxenná Jesús: “Naga cha'a neda' quebe gaca sa'le le'e”

²¹ Nadxa Jesús guzre' benne' ca':

—Wexá'a neda', na' le'e xexílajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

²² Nadxa benne' judío ca' gulé ljwezre':

—¿Gute cuine', ne chee le na' dxenné' quebe gaca chéajdxu naga cheaj Le'?

²³ Nadxa Jesús guzre' benne' ca':

—Le'e nácale chee zran xabáa nigá. Neda' naca' chee xabáa na'la. Le'e nácale chee xēzr la xu nigá. Neda' quebe naca' chee xēzr la xu nigá.

²⁴ Chee le na' gucha' le'e wátele lu dul-la nabágale, lawe' da che quebe dxéajle zúaqueza' neda', wátele lu dul-la nabágale.

²⁵ Nadxa benne' ca' buluchebe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudaute.

²⁶ Déle'e da dxal-la' nnia' chee, ne da dxal-la' guchi'a ca naca da dxunle. Bénnea' gusél-le' neda' dxenné' da li, na' da dxapa' bēnneache naca na da ba benda' gunné Le', lácala quebe dxezaca ba lázrelele na.

27 Benne' ca' quebe guléajni'ine' dxuchálajle Jesús le' ca naca cheē Dios, Xre'.

28 Nadxa Jesús guzre' benne' ca':

—Gate le'e chísale sibe neda', Benne' Gulje' Bénneache, nadxa xúnbeale zúaqueza' neda', ne quebe bi dxuna' da naca cheé̄zqueza'. Tuze dxennéa' ca da ba ble'e Xra' neda'.

29 Bénnea' gusel-le' neda' zúalequeze' neda'. Xra' quebe nucá'ane' neda' tuza' lawe' da tu dxúnzqueza' ca da dzezaca ba lazre' Le'.

30 Ca gunná Jesús da caní, guléajle benne' zan chee'.

Benne' zaj naque' cheē Dios, ne benne' ca' nuxru dul-la le'

31 Nadxa Jesús guzre' benne' judío ca', benne' dxeléajle'e chee':

—Che le'e sē típale lu da dxapa' le'e, da li nácale neda' tuze.

32 Gúnbeale da li, na' da li na' guselá na le'e.

33 Belexechebe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca benne' zaj nada'u. ¿Bizr cheē na' dxennáu' Lue' lantu'?

34 Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'.

35 Nu benne' xu'e lu na' tu benne' ca benne' nada'u quebe tu súazqueze' xu'u na'. Zrí'inequeze bénnea' wazúatequezebe'.

36 Cheē le na', che neda', Zri'ine Xra', guselá le'e, da li láquezle le'e.

³⁷ Nezda' nácale le'e xrtia Abraham. Na'a dxaca lázrele gútele neda' lawe' da quebe dxezí' lu na'le da dxapa' le'e.

³⁸ Neda' dxuchálaja' ca naca da ble'e Xra' neda', na' le'e dxunle ca da guzre xráquezle le'e.

³⁹ Belexechebe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham.

⁴⁰ Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bene' da caní.

⁴¹ Le'e dxúnquezle ca da dxun xráquezle.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

⁴² Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios naselle' neda'.

⁴³ ¿Bizr chee na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'.

⁴⁴ Xráquezle le'e naca da xriwe'. Le'e nácale chee da na', ne dxaca lázrele gunle ca da dxaca lazre' le na. Da xriwe' na' naca na wete benne' nédxudaute. Cabata' dxenné na da li lawe' da quebe bi zua da li nen le na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na.

⁴⁵ Lácala dxapa' le'e da li, le'e quebe dxéajlele chia'.

⁴⁶ ¿Núlale le'e séquele gulé'ele nabaga neda' tu dul-la? Che dxennéa' da li, ¿bizr chee na' quebe dxéajlele chia'?

⁴⁷ Benne' naque' chee Dios dxenne' dizra' chee Dios. Le'e quebe nácale chee Dios. Chee le na' quebe dxaca lázrele xénele chee Dios.

Cristo ba zúaqueze' nédxudxa ca Abraham

⁴⁸ Nadxa benne' judío ca' gulé'e Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

⁴⁹ Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala.

⁵⁰ Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle.

⁵¹ Da li dxapa' le'e: Benne' dxune' ca naca dizra' chia', cabata' gátequeze bénnea'.

⁵² Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' gune' ca naca dizra' chiu' cabata' gátequeze'.

⁵³ ¿Nácadxu' szrendxa ca xra xrtáudxu Abraham? Gútequeze Le', ne cá'anqueze gulate benne' ca' buluchálaje' waláz chee Dios. ¿Bízraqueze dxugune cuinu'?

⁵⁴ Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale.

55 Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'.

56 Xra xrtáule Abraham, bénnea' gutie' nédxudaute, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

57 Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

58 Jesús bechebe':

—Da li dxapa' le'e, nédxudaute gate quebe ne sua Abraham, báchequeze zua' neda'.

59 Nadxa gulequé'e xiaj chee xelu'e Jesús, na' Le' bcache cuine'. Bdee' ládujla benne' ca', na' bedxúaje' chale'aj xudau', ne bezé'e.

9

Jesús dxexune' tu benne' gúlaje' la chul-la

1 Gate gudé Jesús tu lataj, na' blé'ene' tu benne' gúlaje' la chul-la.

2 Benne' ca' dxusede Jesús buluchebe' Le':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben léqueze' dul-la?

3 Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee gulé'e lau xel-la' szren chee Dios ne chee benne' nigá.

4 Dxácate naca te zra dxal-la' guna' zrin chee Bénnea' nasele' neda' lawe' da ba za da chul-la gate netú benne' quebe seque' guné' zrin.

⁵ Dxácatę ne zua' neda' xęzr la xu nigá, naca' xel-la' naxaní' cheę bęnneache.

⁶ Ca gudę gunná Jesús da nigá, na' bzre'e zrene' lu xu, ne bęne' guna' nen zrene' na', na' btupe' na xiaj lau benne' la chul-la na'.

⁷ Nadxa guzre' le':

—Guxíaj xeajtibe lau' lu beaj nisa nazí le na Siloé. (Dizra' nigá zéaję na: Da Nasel-la Na.)

Benne' la chul-la na' guxíaję' xeajtibe lawę', na' gate bezrine' ba dxelé'ene'.

⁸ Nadxa benne' walíZR cheę' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bęnnea' dxebé'e dxenabę' guna'?

⁹ Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'e.

Benne' ná'queze gunné':

—Neda' na'.

¹⁰ Nadxa buluchebe' le':

—¿Ájazra na' ba dxelé'enu'?

¹¹ Bechebe bęnnea':

—Bęnnea' le' Jesús bęne' guna', ne btupe' na xiaj lawa', na' gunné': “Guxíaj beaj nisa nazí le na Siloé, xeajtibe lau'.” Guxá'a na', na' gate gudiba' lawa', guca ble'eda'.

¹² Nadxa buluchebe' le':

—¿Ga na' zua bęnnea'?

Le' guzre' benne' ca':

—Quebe nezda'.

Benne' fariseo ca' dxuluchebe' bęnnea' guque' la chul-la

13 Nadxa benne' ca' guleché'e bēnnea' guque' la chul-la lau benne' fariseo ca'.

14 Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'.

15 Chee le na' benne' fariseo ca' buluchebe' bēnnea' guque' la chul-la ájazra guca dxelé'ene'. Le' guzre' benne' ca':

—Bzrie' guna' xiaj lawa', na' bexiba' na, ne dxelé'eda'.

16 Nadxa bal-la benne' judío ca' gulenné':

—Bēnnea' bene' da nigá quebe naque' chee Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxune' xel-la' waca zrente caní che naque' benne' dul-la?

Ca'an guca, gulaca chupa la'a benne' fariseo ca'.

17 Xecha lasa buluchebe' bēnnea' guque' la chul-la:

—¿Bi dxennáu' lue' chee bēnnea' bexune' lue'?

Le' gunné':

—Neda' dxennéa' naque' benne' dxuchalaje' waláz chee Dios.

18 Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bēnnea' bexaque'.

19 Na' buluchebe' xra xrna bēnnea':

—¿Nácaqueze benne' nigá zrí'inele, dxennale le'e gúlaje' la chul-la? ¿Ájazra na' dxaca dxelé'ene'?

20 Belexechebe xra xrne'e:

—Nézentu' benne' nigá naque' zrí'inentu', ne gúlaje' la chul-la.

21 Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe le'. Ba nápaqueze' iza, ne waca xechébequeze'.

22 Caní gulenná xra xrne'e lu xel-la' dxelezrebe lawe' da ba zaj nun benne' xíchaje chee judío ca' tuze dizra' xelexebéaje' xu'u na' núteteze benne' xechébe' Jesús naque' Cristo.

23 Chee le' na' gulenná xra xrne'e: “Le guchebe le'. Ba nápaqueze' iza.”

24 Nadxa benne' judío ca' belenné' bénnea' guque' la chul-la, na' gulé'e le':

—¿Gunné da li lau Dios! Nézentu' naca benne' nigá benne' dul-la.

25 Le' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

26 Na' buluchébequeze' le':

—¿Bizra bene' chiu'? ¿Ájazra bene' chee bexune' xiaj lau'?

27 Na' bechebe bénnea':

—Ba gucha' le'e, ne quebe dxénele chia'. ¿Bizr chee na' dxaca lázrele nnia' xetú? ¿Cá'aqueze le'e dxaca lázrele gácale Le' tuze?

28 Nadxa benne' judío ca' gulenné' schanni' chee bénnea' guque' la chul-la, dxelenné':

—Lue' da'u bénnea', na' netu' da'ntu' Moisés.

29 Netu' nézentu' Dios bchálajlene' Moisés. Quebe nézentu' ga benne' benne' nigá.

30 Nadxa bénnea' bechebe':

—Da nigá naca na da dxebáneda'. Le'e quebe nézele ga bénnea', na' bexune' xiaj lawa'.

31 Nézquezdxu Dios quebe dxenne' chee benne' dul-la. Tuze dxenne' chee benne' ca' dxulucá'ana szrene' Le', ne dxelune' ca da dxaca lazre' Le'.

32 Quebe ne xendxu che nu benne' xexune' tu benne' gúlaje' la chul-la.

33 Chela benne' nigá quebe naque' chee Dios, quebe gaca bi gune'.

34 Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzéajni'inu' netu'?

Nadxa belexebéaje' le' lu xu'u na'.

Benne' zaj naque' la chul-la lu xichaj lázrdawe'

35 Jesús benne' belexebéaje' bènea' guque' la chul-la, na' gate bezrague' le', guzre' le':

—¿Dxéajle'u lue' chee Zri'ine Dios?

36 Benne' na' guzre' Jesús:

—Xran, guzre neda' Nu na', chee chéajle'a chee'.

37 Bechebe Jesús:

—Ba blé'equeznu' Le'. Neda', dxuchálajlena' lue' naca' Bènea'.

38 Nadxa benne' na' bzu zribe' lau Jesús, na' gunné':

—Dxéajle'a chiu', Xran.

39 Nadxa gunná Jesús:

—Neda' bla'a lu xezr la xu nigá chee guchi'a ca da dxelún bèneache, chee xeledé'e la chul-la ca', ne chee xelexaca ca la chul-la benne' ca' dxelenné' dxeledé'ene'.

40 Nadxa bal-la benne' fariseo ca', benne' zaj zre'e nen Jesús, gate belenne' da nigá gunná Jesús, buluchebe' Le':

—¿Cá'aqueze netu' nácantu' la chul-la?

41 Jesús bechebe':

—Chela nácale le'e la chul-la quebe nabágale ca naca dul-la da benle. Dxennale dxelé'ele, na' chee le na' nabágale dul-la.

10

Dxuchalaj Jesús da dxulé'e na ca naca chee le'aj chee zrila' ca'

¹ Na' gunná Jesús:

—Da li dxapa' le'e, bénnea' quebe dxu'e dxu'a dxa xu'u chee le'aj chee zrila' ca', na' dxu'e naga xula, naque' gubán, ne tu dxebánzqueze'.

² Bénnea' dxu'e dxu'a dxa xu'u na' naque' benne' dxuxúequeze' zrila' ca'.

³ Bénnea' zue' dxu'a dxa xu'u dxesálaje' chee chu'u bénnea' dxuxúequeze'-ba', na' zrila' ca' dx-elexúnbeaba' chi'e. Benne' nigá dxu'e la tu tu zrila' ca', ne dxebéaje'-ba' lu le'aj cheeba'.

⁴ Ca dxedé dxebéaje' xúguteba', na' dxebía lawe' lauba', na' zrila' ca' zjácáleba' Le', lawe' da dx-elexúnbeaba' chi'e.

⁵ Quebe zjácáleba' tu benne' quebe zaj núnbeaba'. Dxuluzrúnnujba' lau benne' na' lawe' da quebe dxelexúnbeaba' chi'i benne' quebe zaj núnbeaba'.

⁶ Bchálajle Jesús benne' ca' da dxulé'e nigá, na' benne' ca' quebe guléajni'ine' bi zéaje da guzre Jesús le'.

Jesús naque' benne' chawe' dxuxúe' zrila' ca'

⁷ Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bénneache zaj naque' ca zrila' chia' ca'.

⁸ Xúgute benne' dxuluxúe' zrila', benne' belelé'e nédxudxa ca neda', gulaque' gubán, ne

tu gulebáanzqueze'. Zrila' ca' quebe beléneba' chee benne' ca'.

⁹ Neda' naca' dxa xu'u. Bénnea' chu'e ne chia' neda', láqueze bénnea'. Gaque' ca tu zrila' dxu'uba', ne dxuajba' le'aj cheeba', na' dxezréleba' zriédu dxáguba'.

¹⁰ 'Benne' gubán ze'e tuze chee cuane'-ba', ne chee gútete'-ba, ne chee guzría xi'te'-ba'. Neda' bla'a chee gápale xel-la' nabán, ne chee gapa xánnele na.

¹¹ Neda' naca' benne' chawe' dxuxúa' zrila' ca'. Benne' chawe' dxuxúe' zrila' ca' dxuzúe' xel-la' nabán chee' chee guselé' zrila' ca'.

¹² Benne' dxuxúe'-ba' lawe' da dxezi'e lazruj, gate dxelé'ene' za becu' xi'a, na' dxusane' zrila' ca', ne dxuzrúnnuje', lawe' da quebe nácaqueze' benne' dxuxúe' leba', na' zrila' ca' quebe zaj nácaba' be cheézqueze'.

¹³ Benne' nigá dxuzrúnnuje' lawe' da dxunze' zrin chee si'e lázruje', na' quebe dxe'e gunne xue cheeba'.

¹⁴⁻¹⁵ 'Neda' naca' benne' chawe' dxuxúa' zrila' ca'. Cáteze núnbea Xra' neda', na' neda' núnbe'a Xra', cá'anqueze neda' núnbe'a zrila' chia' ca', na' leba' zaj núnbeaba' neda'. Neda' dxuzúa' xel-la' nabán chia' chee guselá' zrila' ca'.

¹⁶ Cá'anqueze zaj zra' zrila' chia' quebe zaj zraba' lu le'aj nigá. Dxal-la' cheajxexri'a-ba'. Zrila' ca' xelunba' ca dxenná xrtizra', ne xelácaba' tu cueze, na' tuze benne' guxúe' leba'.

¹⁷ 'Xra' nazrí'ine' neda' lawe' da dxuzúa' xel-la' nabán chia', na' xecá'a na.

¹⁸ Quebe nu seque' cua xel-la' nabán chia'. Neda' xuzúa' na cáteze dxaca lázrequeza' neda'. Napa'

xel-la' dxenná bea guzúa' na, ne chee xecá'a na. Da nigá naca na da gunná be'e Xra' neda' guna'.

¹⁹ Gate benne' judío ca' belenne' dizra' caní, na' gulaque' chupa la'a xetú.

²⁰ Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

²¹ Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chul-la?

Dxuluzúa benne' judío ca' Jesús chalá'ala

²² Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios.

²³ Jesús dxedé' chale'aj xudau' na' naga naca lachila chee Salomón.

²⁴ Nadxa benne' judío ca' guléchaje' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátégala.

²⁵ Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'.

²⁶ Le'e quebe dxéajlele chia' lawe' da quebe nácale zrila' chia', ca ba gucha' le'e nédxula.

²⁷ Zrila' chia' dxelexúnbeaba' chi'a, na' neda' núnbe'a-ba', na' leba' dxelauba' neda'.

²⁸ Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne

cabáta'quezdxa xelebía xi'e, na' quebe nu seque' xecá'a le' lu na'a neda'.

²⁹ Xra' benne' neda' benne' caní, na' Le' nácadxe' szren ca xúgute bénneache, na' quebe nu seque' xecá'a benne' ca' lu na' Xra'.

³⁰ Neda', ne Xra' tuze nácantu'.

³¹ Nadxa benne' judío ca' gulequé'e xiaj xetú chee xelúti'e Jesús.

³² Nadxa Jesús guzre' benne' ca':

—Ba bénqueza' da zan da chawe' laule le'e, dxuchíneda' xel-la' waca chee Xra'. ¿Nula chee da chawe' caní güele neda' xiaj?

³³ Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bénneache, na' dxun cuinu' Dios.

³⁴ Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'.

³⁵ Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulezí'e xrtizre' zaj naque' dios ca'.

³⁶ Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios?

³⁷ Che quebe dxuna' ca naca da dxun Xra', quebe chéajle chia'.

³⁸ Che dxuna' na, lácala quebe dxéajle chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

³⁹ Xetú lasa gulaca lazre' xelexe' Jesús, na' Le' gulé' lu na' benne' ca'.

⁴⁰ Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bènneache nisa.

⁴¹ Benne' zan xjaque' xeajlenné'e Jesús, na' gu-lenné':

—Juan, da li quebe bi xel-la' waca zren bene', na' xúgute da gunné' ca naca chee benne' nigá naca na da li.

⁴² Benne' zan guléajle'e chee Jesús lataj na'.

11

Ca guca gate gute Lázaro

¹ Zua tu benne' dxé'ene' le' Lázaro, benne' xezre Betania, da naca na lazre María, ne bi bile' le' Marta.

² María nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelále'e zixre, ne bsebizre' na nen xicha xíchaje'.

³ Dxúpaté nu'ula caní gulesel-le' benne' xeajezre' Jesús:

—Xran, bènnea' nazrí'inu' quebe chawe' zue'.

⁴ Ca ben Jesús da nigá, na' gunné':

—Da dxé'ene' quebe naca na da gútete na le'. Naca na chee gulé'e lau na xel-la' szren chee Dios, ne cá'aqueze chee gulé'e lau na xel-la' szren chia' neda', Zrí'ine Dios, ne chee xel-la' we' na'.

⁵ Lácala nazrí'i Jesús Marta, ne bi bile', ne Lázaro,

⁶ gate benne' quebe chawe' zua Lázaro na', begá'ane' naga zue' xechupa zra.

⁷ Ca gudé na' guzre' benne' ca' dxusédené':

—Le chu'u naga nababa Judea xetú.

⁸ Nadxa benne' ca' gulé'e Le':

—Benne' Wesede, ná'asca benne' judío ca' zaj zre'e na' gulaca lazre' xelútię' Lue' nen xiaj. ¿Dxaca lazru' chéaju' na' xetú?

⁹ Jesús guzre' benne' ca':

—¿Quebe nun Dios dute te zra gate dxelún bēneache zrin? Che nu benne' dxedé' te zra, quebe cheajchazię' lu da stebe lawe' da dxelé'ene' xel-la' naxaní' da nuzúa Dios lu xęzr la xu nigá.

¹⁰ Che nu benne' dxedé' chizrela, dxechégüę' lawe' da quebe zúale xel-la' naxaní' le'.

¹¹ Ca gudé na' guzre Jesús benne' ca':

—Benne' ljwézredxu Lázaro ba dxásię'. Cha'a neda' cheajsebana' le'.

¹² Nadxa benne' ca' gulé'e Jesús:

—Xran, che dxásię', wexaque'.

¹³ Da nigá da gunná Jesús zéaję na ba gute Lázaro. Benne' ca' dxusédene' guléquene' gunná Jesús dxáseze'.

¹⁴ Nadxa Jesús bzéajni'ine' benne' ca', gunné':

—Ba gútequeze Lázaro.

¹⁵ Dxebeda' lawe' da quebe zua' na'. Caní gácadxa chawe' cheęle le'e, cheę chéajlele chia'. Le chu'u cheajnnadxu Lázaro.

¹⁶ Nadxa Tomás, bēneea' léqueze' bilide', guzre' xezícala benne' ca':

—Le chú'uqueze dxi'u cheę gátedxu tu zren nen Jesús.

Jesús naque' benne' dxusebane' benne' gate ca', ne benne' dxunne' dxi'u xel-la' nabán li lazre'

¹⁷ Gate belezrinę' xęzre Betania, na' bene Jesús gudapa zra bulucache' Lázaro.

18 Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na',

19 na' benne' zan benne' judío ca' xjaque' xea-jlenné'e Marta ne María, na' xulunézruje' le' xel-la' zren lazre' lawe' da gute bi zane'.

20 Gate ben Marta ba za' Jesús, na' guzé'e zea-jxrigale' Le', na' María begá'ane' xu'u.

21 Marta guzre' Jesús:

—Xran, chela zu' nigá, quebe gute bi zana'.

22 Neda' nezda' Dios gunne' Lue' bíteteze da nabu'.

23 Jesús gunné':

—Webán bi zanu'.

24 Nadxa Marta guzre' Le':

—Nezda' webane' lu zra xelexebán benne' gate ca', zra bzebe na'.

25 Nadxa gunná Jesús:

—Neda' naca' benne' dxusebáne' benne' gate ca', ne benne' dxunne' xel-la' nabán li lazre'. Nu benne' dxéajle'e chia', lácala gatie', webane',

26 na' xúgute' benne' zaj naca bané', ne dxeléajle'e chia', québequeze xelatie' tu chi'ize. ¿Dxéajle'u da nigá?

27 Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

Jesús dxebezre' lawe' da zaj zua baxache' nu'ula ca'

28 Ca gudé gunná Marta da nigá, na' guxíaje' xeaizenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

29 Ca ben María da nigá, na' guxase' guzé'e, xeaizné'e Jesús.

30 Jesús quebe ne chu'e xezre na', na' zue' naga bezraga Marta Le'.

31 Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácale benne' caní le', dxeléquene' zéaje' dxu'a ba zeajchezre' na'.

32 Gate bzrin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

33 Gate ble'e Jesús dxebezre María, ne cá'unqueze dxelebezre judío ca', benne' zjácalene' María, na' bexíajele'ene', ne guzúe' stebe lu lázrdawe'.

34 Na' bchebe' benne' ca':

—¿Ga bcáchele bénnea'?

Na' gulé'e Le':

—Xran, gudá le'enu'.

35 Na' gudxezre Jesús.

36 Nadxa gulenná benne' judío ca':

—Le nna'xque cáтите nazrí'ine' le'.

37 Bal-la benne' ca' gulenné':

—Benne' nigá bexune' benne' la chul-la. La zue' nigá, ¿quebe guzéquene' ájala gune' chee quebe gute Lázaro?

Jesús dxusebane' Lázaro

38 Jesús guzúe' stebe xetú, na' bzrine' dxu'a ba. Ba na' naca na tu bluaj, na' da' tu xiaj ta'a dxu'e na.

39 Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bénnea' tula, lawe' da ba guca tapa zra na'a gutie'.

40 Na' Jesús gunné':

—¿Quebe gucha' lue' che chéajlę'u chia', walé'enu' xel-la' szren cheę Dios?

⁴¹ Nadxa belexequé'e xiaj ta'a na'. Jesús guné'e xabáa, gunné':

—Xrae, dxapa' Lue': “Xcalenu” lawe' da ba bennu' chia'.

⁴² Neda' nezda' tu dxénzquezenu' chia'. Dxennéa' da nigá cheę gaca tu da ba neza cheę benne' caní, cheę xeléajlę'e chiu' nase-lu' neda'.

⁴³ Ca gudé gunné' da nigá, na' gunné' zizraj:

—¡Lázaro, bedxúaj nigá!

⁴⁴ Bedxúaj benne' gate na', nadxéaj ni'a ne'e nen ládxe'dau' da buluchelę' ni'a ne'e, na' lawe' dxela na ladxe'. Jesús guzre' benne' ca':

—Le xesezre', ne le gusanę' xexíaję'.

Benne' dxeledábague' Jesús dxelunę' tuze dizra' xelexlę' Le'

(Mt. 26.1-5; Mr. 14.1-2; Lc. 22.1-2)

⁴⁵ Nadxa guléajlę benne' zan cheę Jesús, benne' judío ca' xjácale María, ne belelé'ene' ca da ben Jesús.

⁴⁶ Bal-la benne' ca' xjaque' xeajlechálajlęne' benne' fariseo ca', na' buluzenne' le' ca da ben Jesús.

⁴⁷ Nadxa fariseo ca', ne benne' xíchaję ca' cheę bxruze ca' belezrague' nen benne' xu'u lawe' blau cheę judío ca', na' gulenné':

—¿Ájazra gundxu? Benne' nigá dxúnlę'e xel-la' waca da za xabáa.

⁴⁸ Che ca' güedxu Le' lataj, xúgute bénneache xelexlę'e cheę' cheę xuluzúe' Le' ca wenná bea, na' xelexlá' benne' Roma ca', benne' zjaque' wedil-la,

na' xuluzría xi'e xudau' cheedxu, ne xezr la xu cheedxu.

⁴⁹ Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele,

⁵⁰ ne quebe dxeque be'ele gácadxa chawe' cheedxu gate' tuze benne' ne chee xezre nigá, ne quegala ca naca xezr la xu nigá cuía xi na.

⁵¹ (Quegá gunná Caifás da nigá cheézqueze'. Lawe' da naque' bxruze blau iza na', bchálaje' waláz chee Dios, gunné' gate' Jesús ne chee xezr la xu judío.

⁵² Quegá gatie' tuze ne chee xezr la xu naze. Cá'anqueze chee xutupe' lu na' Dios xúgute benne' zaj naque' chee Dios, benne' zaj nase dínnaje', benne' ca' zaj nababe' xúgute cue' xezr la xu.)

⁵³ Ca'an guca, ca lu zra na'te benne' judío wenná bea ca' belune' tuze dizra' xelútie' Jesús.

⁵⁴ Chee le' na' Jesús québedxa gudé' naga zaj zra' benne' wenná bea ca' chee judío ca', na' guzé'e naga nababa Judea, na' guxíaje' xezre Efraín naga zua gáguze tu le'e xixre' lawe' lataj. Begá'ane' xezre na' nen benne' ca' dxusédene'.

⁵⁵ Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua.

⁵⁶ Guledé' dxelexílaje' Jesús, na' gate zaj zre'e chale'aj xudau' na', buluchebe ljwezre':

—¿'Ajzra dxéquele? ¿Wide' laní, che quebe xide'?

⁵⁷ Benne' fariseo ca', ne benne' xíchaje' ca' chee bxruze ca' ba gulebéaje' dizra' che nu benne' ca'

nézene' ga zua Jesús, na' xelé'e benne' ca' chee gaca xelel-le' Le'.

12

*María dxugu'e da dxelá zixre ni'a Jesús
(Mt. 26.6-13; Mr. 14.3-9)*

¹ Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bènea' bsebán Jesús ládujla benne' gate'.

² Lu xezre na' beluné' tu xrche', chee gulape' ba lá'ana Jesús. Marta bdeé' xel-la' wagu, na' Lázaro dxé'lene' benne' ca' dxelágulene' Jesús.

³ Nadxa María guqué'e tu xia da za da dxelále'e zixre, da naca na chee dusén lase, da zácale'e na, na' gulu'e da za na' ni'a Jesús, ne bsebizre' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'.

⁴ Nadxa Judas Iscariote, zri'ine Simón, tu benne' ca' dxusede Jesús, ne naque' bènea' gudée' Jesús lu na' benne' guledábage' Le', gunné':

⁵ —¿Bizr chee na' quebe gudá'u da zixre na', na' sidxu na dumí lazruj chee chunna gaxúa zra chee gácaledxu benne' xache' ca'?

⁶ Quebe gunná Judas da nigá lawe' da dxe'e gunne xue chee benne' xache' ca'. Naque' gubán, ne nu'e bzude dumí chee benne' ca' dxusede Jesús, ne dxebane' late' weaj dumí na' da dxuluzré'e lu bzude na'.

⁷ Nadxa Jesús guzre' Judas na':

—Be lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xedxu ba.

⁸ Benne' xache' ca' tu zrázqueze' ládujla le'e. Neda' quebe tu súazqueza' nen le'e.

Dxelunę' tuze dizra' xelútię' Lázaro

⁹ Zane' benne' judío ca' belenne' zua Jesús xęzre Betania, na' xjaque' na', quegá tuze zeajlenné'ę Jesús. Cá'anqueze zeajlenné'ę Lázaro, bēnea' bsebán Jesús ládujla benne' gate ca'.

¹⁰ Nadxa benne' xíchaję ca' cheę bxruze ca' belunę' tuze dizra' cá'anqueze xelútię' Lázaro,

¹¹ lawe' da ne cheę Lázaro benne' zan benne' judío ca' dxelebéaj xíchaję' bxruze ca' cheę xelea-
jlé'ę cheę Jesús.

Dxexú'u Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xęzre na'.

¹³ Nadxa gulechugę' zina', na' xjaque' xea-
jlexrígale' Jesús, ne dxelenné' zizraj:

—¡Gaca ba lá'azxa Dios! ¡Ba neza zrentę naca na cheę Benne' zę'ę waláz cheę Xránadxu Dios! ¡Ba neza zrentę naca na cheę Wenná Bea cheę xęzre Israel!

¹⁴ Jesús xeaixraque' tu burro, na' guzríę'-ba', ca naxúaj na lu xiche cheę Dios, dxenná na:

¹⁵ Quebe zrēbele le'e, benne' zrę'ę xęzre Sión.

Le nna'xque, ba za' Wenná Bea cheęle.

Zrię' tu burro.

¹⁶ Nédxute benne' ca' dxusede Jesús quebe guléajni'ine' da na' dxaca na. Ca gudé na', gate begá'ana szren Jesús lau Dios, na' xeaјlesá lazre'

xúgute da caní zaj naxúaj na lu xiche chee Dios ca naca chee Jesús, na' ca'an guca chee'.

¹⁷ Benne' ca' zaj zre'e nen Jesús gate gunné' Lázaro lu xedxu ba, ne bsebané' le' ládujla benne' gate, buluzenne' bèneache Jerusalén ca da guca na'.

¹⁸ Chee le na' benne' caní xeajlexrígale' Jesús lawe' da belenne' ca naca xel-la' waca zrente da bene'.

¹⁹ Nadxa benne' fariseo ca' gulé ljwezre':

—Ba dxelé'ele quebe séquedxu bi gundxu. Ca naca bèneache dxelune' Le' tuze.

Dxelexilaj benne' griego ca' Jesús

²⁰ Zaj zra' bal-la benne' griego ca' ládujla benne' ca' belezrine' Jerusalén chee xulucá'ana szrene' Dios lu laní na'.

²¹ Benne' caní belezrine' lau Felipe, benne' Bet-saida chee ga nababa Galilea, ne naque' Jesús tuze, na' gulata' xuene' le', dxelenné':

—Benne', dxaca lázrentu' le'entu' Jesús.

²² Felipe guxíaje' xeajezre' Andrés caní, na' xjaca dxupe' xeajleguezre' Jesús ca'.

²³ Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Gulje' Bèneache.

²⁴ Da li dxapa' le'e, tu binne zrua' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'.

²⁵ Benne' dxe'e gunne xue gapa chi'e xel-la' nabán chee' gunitie' na. Bènea' dxuzúe' chalá'ala xel-la' nabán chee' lu xezr la xu nigá, gapa chi'e na, ne zrué'ene' xel-la' nabán da zeajlí canna.

²⁶ Che nu benne' dxaca lazre' gunē' zrin chia', dxal-la' gaque' neda' tuze, na' gáteteze sua' neda', na' súaqueze benne' dxune' zrin chia'. Che nu benne' dxune' zrin chia', Xra' gape' le' ba lá'ana.

Jesús dxuchálaje' ca gaca gate gatiē'

²⁷ Gunná Jesús:

—Na'a stébele'e zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájqueza' chee gaca chia' da caní.

²⁸ Xrae, bca'ana szren lau'.

Nadxa ben tu chi'i benne' dxenné' xabáa:

—Ba bca'ana szrena' na, ne gucá'ana szrena' na xetú.

²⁹ Benne' ca' zre'e na' dxellenē' gulennē' guziu' gunné. Xebal-le' gulenné':

—Tu gubáz chee xabáa bchálajlene' Le'.

³⁰ Nadxa Jesús guzre' benne' ca':

—Quegá gunné chi'e na' ne chia' neda'. Gunné na ne cheele le'e.

³¹ Na'a ba bzrin zra guchi'a Dios chee bénneache zre'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na.

³² Gate xelechise' neda' lu xezr la xu nigá le'e xaga béguaj, na' neda' nnia' xúgute bénneache chee xelaque' neda' tuze.

³³ Gate gunné' caní, ble'e Jesús ca gatiē'.

³⁴ Nadxa benne' zan ca' gulé'e Jesús:

—Netu' bémentu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna. ¿Bizr chee na' dxennáu'

Benne' Gulje' Bénneache xelechise' Le'? ¿Nuzra na' Benne' Gulje' Bénneache?

³⁵ Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácatę ne zua xel-la' naxaní' nen le'e, cheę quebe xrínnele, lawe' da benne' dxedé' lu da chul-la quebe nézene' ga zéaje'.

³⁶ Le cheajlé cheę xel-la' naxaní' da naca' neda' dxácatę zua xel-la' naxaní' nen le'e, cheę gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

Benne' judío ca' quebe dxelejle'e cheę Jesús

³⁷ Lácala ble'e Jesús zane' xel-la' waca zrentę lau benne' judío ca', quegá xúgutę' guleajlé'e cheę',

³⁸ lawe' da ben na ba xen guca ca da gunná Isaías, benne' bchálaje' waláz cheę Dios, gunné':

Xran, ¿nuzra guxeajlé cheę dizra' cheędxu?

¿Nuzra na' ble'e Xránadxu xel-la' waca cheę'?

³⁹ Ca'an guca, quebe guca xeleajlé'e cheę' lawe' da caní gunnáqueze Isaías na':

⁴⁰ Dios bene' benne' ca' la chul-la, ne bene' zide' lázrdawę',

cheę quebe xeelé'ene' nen xiaj lawę',

ne quebe xelájni'ine' lu xichaj lázrdawę',

ne quebe xeelé'e lawa' neda' cheę xexuna' le'.

⁴¹ Isaías na' gunné' da nigá lawe' da blé'ene' xel-la' szren cheę Jesús, ne bchálaje' ca naca cheę'.

⁴² Zane' benne' judío ca' guléajle'e cheę Jesús, ne cá'anqueze bal-la benne' xíchaje ca'. Quebe belexechebe' lówela bénneache lawe' da belezrebe' da

xelún benne' fariseo ca', chee quebe xelexebéaje' le' xu'u naga dxelezrague'.

⁴³ Caní belune' lawe' da beledánedxene' xel-la' ba lá'ana da dxelúe bèneache le' ca xel-la' ba lá'ana da dxue Dios le'.

Dizra' chee Jesús guchi'a na chee da dxelún bèneache

⁴⁴ Jesús gunné' zizraj:

—Benne' dxéajle'e chia', quegá cheeza' dxéajle'e, cá'anqueze dxéajle'e chee Xra' nasel-le' neda'.

⁴⁵ Bénnea' dxelé'ene' neda', dxelé'equezne' Xra' nasel-le' neda'.

⁴⁶ Neda', xel-la' naxaní', bla'a lu xezr la xu nigá chee québedxa xelexegá'ana benne' dxeléajle'e chia' lu da chul-la.

⁴⁷ Che nu benne' dxenne' dizra' chia', ne quebe dxune' ca naca na, quegá neda' guzría xi'a le', lawe' da quebe bla'a neda' chee guzría xi'a bèneache. Bla'a chee guselá' benne' ca'.

⁴⁸ Benne' dxuzúe' neda' chalá'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bènea' lu zra bzebe na'.

⁴⁹ Caní gaca na lawe' da quebe dxuchálaja' cheézqueza', lawe' da Xra' nasel-le' neda' ba gunná bé'ene' neda' bi dxal-la' nnia', ne bi dxal-la' gusededa'.

⁵⁰ Neda' nezda' gunná be'e Xra' neda' caní chee xezezeque bèneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

13

Jesús dxibe' ni'a benne' ca' dxusédene'

¹ Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra xezé'e lu xezr la xu nigá chee xexíaje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na'a ba zua gulé'ene' benne' ca' tu da zrendxa da gulé'e na nazrí'ine' le'.

²⁻⁴ Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee gudé'e Jesús lu na' benne' guledábage' Le'. Nézqueze Jesús ze'e naga zua Dios, ne dxal-la' xezrine' naga zua Dios, na' Xre' ba bnézruje' Le' dute xel-la' dxenná bea. Chee le na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'e.

⁵ Nadxa gudé'e nisa tu zriga xia zren, ne guzú lawe' dxibe' ni'a benne' ca' dxusédene', na' bsebizre' ni'e nen ladxe' na' da nunase' dxu'a le'e.

⁶ Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quíbequezu' ni'a?

⁷ Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

⁸ Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

⁹ Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

10 Jesús guzre' le':

—Benne' ba bexuzrte guzje', tuze ni'e dxal-la' chadxelawe' da ba naxádxexeze'. Le'e ba naxádxele, san quegá xúgutele.

11 Gunná Jesús: “Quegá xúgutele”, lawe' da nézene' nu na' gudée' Le' lu na' benne' dxeledábague' Le'.

12 Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'e ga dxelawe', na' guzre' benne' ca':

—¿Dxéajni'ile le'e da ba bēna'?

13 Le'e dxēle neda': Benne' Wesēde, ne: Xran, na' caní dxal-la' nnale lawe' da caní naca'.

14 Che neda', Benne' Wesēde chee', ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule.

15 Neda' ba ble'eda' le'e tu da dxulé'e na, chee' gunle le'e ca da bēna' neda'.

16 Da li dxapa' le'e, tu benne' wēn zrin quebe nácadxē' szren ca xranē', na' tu benne' gubáz quebe nácadxē' szren ca benne' nasele' le'.

17 Che dxéajni'ile da caní, ne dxunle ca zaj naca na, gaca chee' tu da ba neza.

18 'Quebe dxuchálaja' chee' xúgutele le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee' Dios, dxenná na: Benne' dxágule neda' ba gudábague' neda' chee' gudée' neda'.

19 Dxapa' le'e da nigá na'a, nédxula gate quebe ne gaca na, chee' gate gaca na, na' chéajlele le'e zúaqueza' neda'.

20 Da li dxapa' le'e: Benne' dxezí' lu ne'e Bénnea' dxusel-le' neda', neda' na' dxezí' lu ne'e, na' benne'

dxezí' lu ne'e neda', dxezí' lu ne'e Xra' nasel-le' neda'.

*Dxenná Jesús gudé Judas Le' lu na' benne' dx-
eledábage' Le'*

(Mt. 26.20-25; Mr. 14.17-21; Lc. 22.21-23)

²¹ Ca gudé gunná Jesús da nigá, na' guzúe' stebe lu xichaj lázrdawe', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudé'e neda' lu na' benne' ca' dxeledábage' neda'.

²² Nadxa benne' ca' dxusede Jesús gulezú lawe' dxelenná' ljwezre', ne quebe zaj nézene' nu chee na' dxuchalaj Jesús.

²³ Tu benne' ca' dxusede Jesús, bénnea' nazrí'ile'e Jesús le', zue' cuita Jesús naga dxelawe' xrche',

²⁴ na' Simón Pedro bene' tu da dxunna bea lau bénnea' chee guchebe' Jesús nu chee na' dxenné' caní.

²⁵ Nadxa bénnea' de'e cuita Jesús bchebe' Le':

—Xran, ¿nuzra na'?

²⁶ Bechebe Jesús:

—Gusebisa' late' xeta xtila, na' bénnea' gunézruja' na, benne' ná'queze'.

Nadxa Jesús bsebiše' late' xeta xtila, na' bnézruje' na chee Judas Iscariote, zri'ine Simón.

²⁷ Ca gucá'a Judas xeta xtila na', na' da xriwe' guxú'ute' na lu xichaj lázrdawe'. Nadxa Jesús guzre' le':

—Da dxal-la' gunu', béntega na.

²⁸ Benne' ca' zaj zre'e dxelawe' na' quebe guléajni'ine' bizr chee na' guzre' Judas na' caní.

29 Lawe' da nua Judas bzude' dumí, bal-le' guléquene' Jesús guzre' le' bi si'e chee laní na', u bi gunézruje' benne' xache' ca'.

30 Ca gudé gudagu Judas xeta xtila na', na' bdxúaje'. Ba guxrinne.

Da nadxiruj bea cube

31 Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne chia' neda'.

32 Che neda', Benne' Gulje' Bénneache, dxulé'eda' ca naca xel-la' szren chee Dios, na' Dios gulé'ene' ca naca xel-la' szren chia' neda', ne la gúntequeze' na.

33 Le'e, bidu chia' ca', québedxa sua' scha' nen le'e. Le'e wexílajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'.

34 Tu da cube dxixruj be'eda' le'e. Le zri'i le sa' ljuézrele tule xetule ca neda' nazrí'ida' le'e. Caní dxal-la' zri'i ljuézrele tule xetule.

35 Che nazrí'i ljuézrele tule xetule, na' xúgute bénneache xeleque bé'ene' nácale neda' tuze.

Jesús dxenné' nna Pedro quebe núnbe'e Le' (Mt. 26.31-35; Mr. 14.27-31; Lc. 22.31-34)

36 Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'lenu' neda' na'a. Te na'a wadéquezu' naga tea' neda'.

37 Nadxa gunná Pedro:

—Xran, ¿bizr chee na' quebe gaca sá'lena' Lue' na'a? Zúaqueza' guzúa' xel-la' nabán chia' chee guna' Lue' tuze.

³⁸ Jesús bechebe':

—¿Zúaquezu' guzú' xel-la' nabán chiu' chee gacu' neda' tuze? Da li dxapa' lue', nédxudxa ca cuezre xjeaj, lue' wannáquezu' chunna lasa quebe núnbe'u neda'.

14

Jesús naque' neza da dxezrín na naga zua Xradxu Dios

¹ Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'.

² Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj chee.

³ Ca te xexá'a cheajxecueza' lataj chee, na' wexelájqueza' xetú chee xedajzezri'a le'e súale neda', chee súale le'e naga súaqueza' neda'.

⁴ Le'e nézele naga cha'a, ne núnbeale neza na'.

⁵ Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

⁶ Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'.

⁷ Chela núnbeale neda', cá'anqueze núnbeale Xra'. Ná'atela núnbeale Le' lawe' da ba dxelé'ele Le'.

⁸ Nadxa Felipe guzre' Jesús:

—Xran, ble'e netu' Xrau', xetú da ná'teze.

⁹ Bechebe Jesús:

—Felipe, scha' ba guzúalena' le'e, na' ¿quebe ne gúnbe'u neda'? Benne' dxelé'ene' neda', dx-elé'equezene' Xra'. Chee le na', ¿bizr chee na' dx-enabu' neda' gulé'eda' le'e Xra'?

¹⁰ ¿Quebe dxéajle'u zúalena' Xra', na' Xra' zúalene' neda'? Da dxapa' le'e, quegá dxennéa' na cheézqueza'. Xra', Bénnea' zúalene' neda', Léqueze' na' dxune' zrin chee' lu na'a neda'.

¹¹ Le chéajlele zúalena' Xra', na' Xra' zúalene' neda', u che cabí dxéajlele ca da dxennéa', le chéajle chia' ne chee da ca' dxuna'.

¹² Da li dxapa' le'e, benne' dxéajle'e chia', gúnqueze' ca da dxuna' neda', na' guné' da zaj nácadxa zren ca da caní dxuna' lawe' da xexá'a neda' naga zua Xra'.

¹³ Xúgutē da nábale le'e lu La' neda', neda' guna' na, chee gulé'eda' neda' xel-la' szren chee Xra'.

¹⁴ Néda'queza' guna' bíteteze da nábale lu La' neda'.

Jesús dxechēbe lazre' sel-le' Be' Lá'azxa

¹⁵ Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e.

¹⁶ Neda' gata' xueda' Xra' sel-le' chee xetú Benne' gácalequeze' le'e, ne súalētecaze' le'e.

¹⁷ Benne' nigá naque' Be' Lá'azxa gulé'ene' le'e ca naca da li. Benne' zaj naca chee xezr la xu nigá quebe xelezéquene' xelezí' lu ne'e Le' lawe' da quebe gaca xelelé'ene' Le', ne quebe zaj núnbe'e Le'. Le'e núnbeale Le' lawe' da zúalene' le'e, ne súaqueze' lu xichaj lázrdaule.

18 Quebe gucá'ana' le'e ca bi wezebe ca'. Welá'queza' súałena' le'e.

19 Xetú chí'idau' bēnneache ca' quēbedxa xełelé'ene' neda', san le'e welé'ele neda'. Le'e tu gaca bānzquezele lawe' da tu naca bānzqueza' neda'.

20 Lu zra na' guéquebe'ele neda' zúalēna' Xra', na' le'e zúalēle neda', na' neda' zúalēna' le'e.

21 Benne' nézene' ca' naca da nadxixruj bea na nuna' neda', ne dxune' na, dxulé'ene' nazrí'iqueze' neda'. Xra' zrí'ine' benne' nazrí'ine' neda', na' cá'anqueze neda' zrí'ida' bēnnea', ne gulé'e lawa' le'.

22 Judas, quegá bēnnea' le' Iscariote, guzre' Jesús:
—Xran, ¿bizr chee na' gulé'e lau' netu', ne quegá gulé'e lau' lau' bēnneache zaj zre'e xezr la xu nigá?

23 Jesús bechebe':

—Benne' nazrí'ine' neda' dxune' ca' naca da dxennéa', na' Xra' zrí'ine' bēnnea', na' neda' ne Xra' xedajsúalēntu' le'.

24 Benne' quebe nazrí'ine' neda' quebe dxune' ca' da dxennéa'. Ca' naca dizra' da dxénele quebe zaj naca na cheézqueza'. Zaj naca na chee Xra' naselle' neda'.

25 'Dxapa' le'e xúgute da caní dxácatē ne zúalēna' le'e,

26 na' Be' Lá'azxa, Bēnnea' sel-la Xra' lu La' neda' chee gácalēne' le'e, Le' gulé'ene' le'e xúgute, ne gusá'queze' lázzele ca' naca xúgute da ba gucha' le'e.

27 'Xel-la' dxebeza zri lazre' dxuca'ana' cheele. Dxunna' le'e xel-la' dxebeza zri lazre' chia'. Quebe dxunna' na ca dxelunna bēnneache xel-la' dxebeza zri lazre'. Quebe cuele gunne xue, ne quebe zrébele.

²⁸ Ba bénele gunnéa' wexá'a, ne welá'a súalena' le'e xetú. Chela da li nazrí'ile neda', suale xel-la' dxebé, lawe' da xexá'a naga zua Xra', na' nácadxa Le' szren ca neda'.

²⁹ Da nigá dxapa' le'e na'a nédxula gate quebe ne gaca na, chee gate gaca na, na' chéajlele chee da dxennéa'.

³⁰ Québedxa guchálajleteca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gune na neda'.

³¹ Caní dxal-la' gaca chee xeleneze bénneache neda' nazrí'ida' Xra', ne dxuna' ca da gunná bé'eng' neda'. ¡Le chasa! ¡Le xebú'u nigá!

15

Jesús dxuchálaje' chee lba uva ne chee zruze na ca'

¹ Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ané' na.

² Le' dxechugue' zruze na ca' da quebe dxelebía na da zixre, ne dxun chi'e zruze na ca' da dxelebía na da zixre chee xelebíadxa na.

³ Le'e nácale ca zruze na ca' da ba nun chi'e, ne chee dizra' da ba gucha' le'e.

⁴ Le súaqueze gácale neda' tuze ca neda' tu zúalezqueza' le'e. Tu zruze xaga quebe gaca cuía na da zixre cheézqueze na che quebe súalequeze na xaga na'. Cá'anqueze le'e quebe bi gaca gunle che quebe tu gácazquezle neda' tuze.

⁵ Neda' naca' bzrigu lba uva, na' le'e nácale zruze na ca'. Bénnea' naque' neda' tuze, na' neda' naca' le' tuze, naque' ca tu zruze na da dxebíale'e na da

zixre, lawe' da quebe bi seque' gunle che quebe gácale neda' tuze.

⁶ Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

⁷ 'Che le'e súatequezle neda' tuze, ne quebe gusanle dizra' chia', waca nácale ca da dxaca lázrele, na' sile na.

⁸ Xra' dxegá'ana szrene' gate nácale ca zruze na ca' da dxelebíale'e na da zixre, ne caní gaca bea na nácale neda' tuze.

⁹ Neda' nazrí'ida' le'e ca nazrí'i Xra' neda'. Chee le na' le súaquezle lu xel-la' zri'i lazre' chia'.

¹⁰ Che gunle ca da dxixruj be'eda' le'e, na' súatequezle lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

¹¹ 'Neda' dxuchálajlena' le'e caní chee súale lu xel-la' dxebé chia', ne chee gaca du lazre' xel-la' dxebé chee.

¹² Cani naca da dxixruj be'eda' le'e: Le zri'i le sa' ljwézrele tule xetule ca neda' nazrí'ida' le'e.

¹³ Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee gácalene' bi ljwezre' ca'.

¹⁴ Le'e nácale bi ljwezra' che dxunle ca da dxixruj be'eda' le'e.

¹⁵ Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgutę da guzre Xra' neda'.

¹⁶ Le'e quebe gunnéle neda'. Neda' gunnéa' le'e, ne ba nuzúa' le'e chee gácale ca zruze lba na' da

dxelebíale'e na da zixre, na' tu súazqueze da zixre na'. Che gunle caní, na' Xra' gunne' le'e xúgute da nábale lu La' neda'.

¹⁷ Da nigá naca na da dxixruj be'eda' le'e: Le zri'i le sa' ljwézrele tule xetule.

Bénneache chee xezr la xu nigá dxelecuídenē' Jesús, ne cá'anqueze benne' chee' ca'

¹⁸ Nadxa gunná Jesús:

—Che bénneache dxelecuídenē' le'e, dxal-la' chea-sá lázrele belecuídequeze' neda' nédxute.

¹⁹ Chela nácale le'e chee xezr la xu nigá, na' xelezrí'i bénneache le'e ca' zaj nazrí'ine' le sa' ljwezre' ca'. Neda' ba gucá'a le'e ládujla bénneache chee xezr la xu nigá, na' chee le na' dxelecuide bénneache le'e lawe' da québedxa nácale xezr la xu nigá tuze.

²⁰ Le gusá lázrele da gucha' le'e, gunnéa': Netú benne' wen zrin quebe nácadxe' szren ca' xranē'. Che guláu zi' xuzre' neda', cá'anqueze xelau zi' xuzre' le'e, na' che belunē' ca' dxenná dizra' chia', cá'anqueze xelunē' ca' dxenná dizra' chee le'e.

²¹ Xúgute da caní xelunē' chee le lawe' da nácale chia', ne lawe' da quebe zaj núnbe'e Xra' nasel-le' neda'.

²² 'Chela quebe bla'a neda', ne bchálajlena' benne' ca', quebe bi dul-la zaj nabague'. Na'a zaj nabágaqueze' dul-la

²³ lawe' da nu benne' dxecuídenē' neda', cá'anqueze dxecuídenē' Xra'.

²⁴ Chela quebe bena' neda' xel-la' waca zren ca' lówela benne' ca' ca da netú benne' quebe ne gunē', na' quebe bi dul-la xelebágue'. Lácala ba belelé'ene' da ca', dxelecuídenē' neda', ne dxelecuídenē' Xra'.

²⁵ Da nigá dxaca na chee gaca li ca naxúaj na lu da nadxiruj bea na da zjácale benne' ca'. Dxenná na: Belecuídenē' neda' ne quebe bi da calela bena' chee benne' ca'.

²⁶ 'Gate xida Bénnea' gácalēne' le'e, Bénnea' naque' Be' Lá'azxa, ne dxulé'ene' da li, Bénnea' sella' neda' waláz chee Xra', Léqueze' xechebe' ca naca chia' neda'.

²⁷ Cá'anqueze le'e wechébequezle ca naca chia' neda' lawe' da zúalele neda' nédxudate.

16

¹ Gunná Jesús:

—Dxapa' le'e da caní chee quebe gusán lázrele da naca chia'.

² Welxebéaje' le'e lu xu'u naga dxelezrague', na' zrin zra gate nüteteze benne' gutie' le'e guéquene' gunē' zrin chee Dios.

³ Caní xelune' lawe' da quebe ne xelúnbe'e Xra', ne neda'.

⁴ Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

Da dxun Be' Lá'azxa

Nadxa gunná Jesús:

—Quebe gucha' le'e da nigá nédxute lawe' da zúalequeza' le'e.

⁵ Na'a wexá'a cheajxezúaleña' Xra' nasele' neda', na' netule le'e quebe dxuchébele neda' ga cha'a.

⁶ Dxewí'ine lázrele lawe' da gucha' le'e da caní.

⁷ Na'a dxapa' le'e da li: Cháwe'dxa gaca cheele le'e che xexá'a neda' lawe' da che quebe xexá'a,

quebe xida Be' Lá'azxa xedajsúalene' le'e, Bénnea' gácalene' le'e. Che xexá'a neda', sel-la' Le' chee_{le}.

⁸ Gate xida Le', na' gulé'ene' bèneache zaj naque' benne' dul-la, ne quebe dxelune' da xrlátaje, na' Dios guzría xi'e benne' caní.

⁹ Zaj naque' benne' dul-la lawe' da quebe dx-eléajle'e chia' neda'.

¹⁰ Xeleque bé'ene' quebe dxelune' da xrlátaje lawe' da xexá'a neda' naga zua Xra', na' le'e québedxa lé'ele neda'.

¹¹ Xeleque bé'ene' Dios guzría xi'e le' lawe' da ba guchugue' chee da xriwe', da na' dxenná bea na lu xezr la xu nigá.

¹² Ne délē'e da dxal-la' xapa' le'e, san le'e quebe gaca chéajni'ile na na'a.

¹³ Gate xida Be' Lá'azxa, Bénnea' dxulé'ene' da li, Le' gulé'ene' le'e ca naca xúgute da li lawe' da quebe guchálaje' cheézqueze'. Wanné' xúgute da xénene', na' guzéajni'ine' le'e ca da dxal-la' gaca na.

¹⁴ Le' gucá'ana szrene' neda' lawe' da wazi'e chee da naca chia' neda', na' guzéajni'ine' na le'e.

¹⁵ Xúgute da napa Xra', cheéqueza' naca na, na' chee le' na' gunnéa', wazí' Be' Lá'azxa da naca chia', na' guzéajni'ine' na le'e.

Xel-la' dxelewí'ine lazre' chee benne' ca' xexaca na xel-la' dxelebé

¹⁶ Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xelé'ele neda' lawe' da xexá'a neda' naga zua Xra'.

¹⁷ Nadxa bal-la benne' ca' dxusede Jesús bu-luchebe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xelé'edxu Le' lawe' da xexíaje' naga zua Xre'.

¹⁸ ¿Bi zéaje da na', xetú chí'idau'? Quebe dxéajni'idxu bi chee dxuchálaje'.

¹⁹ Guque be'e Jesús dxelaca lazre' xuluchebe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xelé'ele neda'. ¿Da nigá na' dxuchebe ljwézrele?

²⁰ Da li dxapa' le'e, wabézrele le'e, ne xewi'ine lázrele, san bènneache chee xezr la xu nigá xelebene'. Lácala le'e xewi'ine lázrele, xel-la' dxewí'ine lazre' chee xexaca na xel-la' dxebé.

²¹ Gate tu nu'ula zua sane' bidau' zue' stebe lawe' da ba bzrin zra sua xel-la' dxudía chee'. Gate te galaj bidu na', na' québedxa dxeajsá lazre' da guzaque' lawe' da dxebéle'ene' chee bidu na' ba gúlajbe'.

²² Cá'anqueze le'e zúale stebe na'a, san neda' welá'queza' xedajxenná'a le'e, na' lu xichaj lázrdaule súatequeze xel-la' dxebé, da naca na tu xel-la' dxebé da quebe nu seque' cua.

²³ 'Lu zra na' québedxa bi guchébele neda'. Da li dxapa' le'e, Xra' gunne' le'e xúgutę da nábale lu La' neda'.

²⁴ Nédxula quebe bi gunábale lu La' neda'. Na'a le naba, na' si'le, chee súale'ele xel-la' dxebé.

Jesús guchuchuj guléaje' da dxaca lu xezr la xu nigá

²⁵ Gunná Jesús:

—Ba gucha' le'e da caní nen dizra' ca' da dxululé'e na. Wazrín zra gate québedxa guchálajlëna' le'e da naca da dxulé'e na. Guchálajlëna' le'e caníqueze da naca chee Xra'.

²⁶ Lu zra na' nábale Xra' lu La' neda', na' quebe dxennéa' neda' gata' xueda' Xra' waláz chee,le,

²⁷ lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajlele chia' za'a naga zua Dios.

²⁸ Guzá'a lau Xra' chee bla'a lu xezr la xu nigá chee xexá'a naga zua Xra'.

²⁹ Nadxa benne' ca' dxusede Jesús gulé'e Le':

—Na'a dxuchálajlënu' netu' caníqueze. Quebe dxuchínenu' dizra' ca' da dxululé'e na.

³⁰ Na'a dxeque bé'entu' nézenu' xúgute da ca', na' quebe dxal-la' nu guchebe Lue'. Chee le na' dxéajlentu' chiu' za'u naga zua Dios.

³¹ Jesús guzre' benne' ca':

—¿Dxéajlele chia' na'a?

³² Za' zra, ne ba naca zra ná'queze gate le'e gase dínnajle ca'ale xrneza cha chee,le, na' gucá'anale neda' tuza'. Quebe zúaqueza' tuza' lawe' da zúale Xra' neda'.

³³ Dxapa' le'e da nigá chee gápale xel-la' dxebeza zri lazre' lawe' da nácale neda' tuze. Lu xezr la xu nigá dxun na ba xen si sácale. Le gun chuchu lázrdaule, lawe' da ba bchuchuj bléaja' da dxaca lu xezr la xu nigá.

17

Jesús dxenabe' Dios xucá'ana chawe'e benne' ca' dxeléajle'e chee'

1 Ca gudé gunné' da nigá, na' Jesús gunné'e xabáa, dxenné':

—Xrae, ba bzrin zra. Bca'ana szren neda', Zri'inu', chee cá'anqueze neda', Zri'inu', gucá'ana szrena' Lue'.

2 Lue' ba bennu' neda', Zri'inu', xel-la' dxenná bea chee nna be'eda' xúgute bénneache, chee gunézruja' xel-la' nabán da zeajlí canna chee xúgute benne' ca' bennu' neda'.

3 Xel-la' nabán da zeajlí canna naca na chee xelúnbe'e Lue', nacu' Dios tu licha', ne li lazre', na' chee xelúnbe'e neda', Jesucristo, Bénnea' gusel-lu' Lue'.

4 'Neda' ba bca'ana szrena' Lue' lu xezr la xu nigá, ne ba bexuzre bəna' da bdxixruj be'enu' neda'.

5 Na'a, Xrae, benna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xezr la xu nigá.

6 'Benne' ca' guca'u Lue' ládujla bénneache, benne' ca' bennu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bennu' neda' benne' ca', na' ba belune' ca' dxenná xrtizru'.

7 Na'a zaj nézene' xúgute da bennu' neda' za na naga zu' Lue'.

8 Ba bnézruja' chee benne' caní dizra' chiu' da bennu' neda', na' benne' caní ba gulezí' lu ne'e na. Ba guleque bé'ene' da li neda' za'a naga zu' Lue', ne ba guléajle'e chiu', gusel-lu' neda'.

9 'Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xezr la xu nigá. Dxen-aba' Lue' ne chee benne' ca' bennu' neda', lawe' da zaj naque' chiu'.

10 Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

11 'Neda' québedxa sua' lu xezr la xu nigá, san benne' caní xelexegá'ane' lu xezr la xu nigá, na' neda' wezá'a nigá, ne xedajxezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'.

12 Gate ne zua' neda' lu xezr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bēnnea' ba nanítequeze', na' caní guca na chee guca li ca naxúaj na lu xiche chiu'.

13 'Na'a ba zezá'a naga zu' Lue'. Dxácatē ne zua' lu xezr la xu nigá dxennéa' da caní chee xelápalēe benne' caní xel-la' dxebé ca da nápaqueza' neda'.

14 Neda' bnézruja' benne' caní dizra' chiu'. Bēnneache chee xezr la xu nigá dxelecuidene' benne' caní lawe' da québedxa zaj naque' tuze nen benne' ca' chee xezr la xu nigá, ca na' neda' quebe naca' tuze nen da naca chee xezr la xu nigá.

15 Quebe dxenaba' Lue' xeca'u benne' caní lu xezr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'.

16 Ca neda' quebe naca' chee xezr la xu nigá, cá'anqueze benne' caní quebe zaj naque' chee xezr la xu nigá.

17 Bzua benne' caní chee xelaque' cheéquezu' Lue' ne chee da li. Dizra' chiu' naca na da li.

18 Ca gusel-lu' Lue' neda' ládujla bēneache zaj naque' chee xezr la xu nigá, cá'anqueze neda' dxusel-le' benne' caní ládujla bēneache zaj naque' chee xezr la xu nigá.

19 Ne chee benne' caní nuzúa cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

20 'Dxata' xueda' Lue', quegaze chee benne' caní, san cá'anqueze chee benne' ca' xeléajle'e chia' gate xelenne' da xuluchalaj benne' caní.

21 Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle bēneache zaj naca chee xezr la xu nigá Lue' gusel-lu' neda'.

22 Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u.

23 Neda' súalēna' benne' caní, na' Lue' súalēnu' neda', chee xelácaqueze benne' caní tuze, na' caní xeleque be'e bēneache Lue' gusel-lu' neda', ne nazrí'inu' benne' caní cáteze nazrí'inu' neda'.

24 'Xrae, Lue' bennu' neda' benne' caní, na' dxaca lazra' xelezúalēne' neda' naga sua' neda', chee xeelé'ene' xel-la' szren da ba bennu' neda', lawe' da nazrí'inu' neda' nédxudautē gate quebe ne gunu' xezr la xu nigá.

25 Xrae chawe', benne' zaj naque' chee xezr la xu nigá quebe zaj núnbe'e Lue', san neda' núnbe'a Lue', na' benne' caní ba zaj nézene' Lue' gusel-lu' neda'.

26 Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i

lazre' dxéquenu' Lue' neda' lu xichaj lázrdau benne' caní, ne chee súale néda'queza' le'.

18

Dxelel-le' Jesús

(Mt. 26.47-56; Mr. 14.43-50; Lc. 22.47-53)

¹ Ca gudé gunná Jesús da caní, na' bdxúajé' nen benne' ca' dxusédene' chee chjaque' xecha la'a xegu Cedrón. Lataj na' zéle'e xaga olivo naga guxú'u Jesús nen benne' ca'.

² Cá'anqueze Judas, bénnea' dxudée' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédene'.

³ Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wen zrin chee xudau', benne' ca' gulesel-la benne' xíchajé ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe.

⁴ Jesús ba nézene' ca da gaca chee', na' chee le na' bdxúajé' lau benne' ca', na' bchebe' le':

—¿Nuzra dxexílajle?

⁵ Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bénnea' dxudée' Jesús lu na' benne' ca' zúaqueze' ládujla benne' ca'.

⁶ Gate gunná Jesús: Neda' na', na' benne' ca' belexebigue' lau Jesús, ne xeajlechazte' lu xu.

⁷ Nadxa Jesús bchebe' benne' ca' da xula:

—¿Nuzra dxexílajle?

Gulenná benne' ca':

—Jesús, benne' Nazaret.

⁸ Nadxa guzre Jesús benne' ca':

—Ba gucha' le'e neda' na'. Che dxexílajle neda', le güe benne' caní lataj cheajxaque'.

⁹ Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'."

¹⁰ Nadxa Simón Pedro, ne nu'e xia, guléaje' na, na' guchugue' naga da zua xabela chee Malco, wen zrin chee bxruze blau.

¹¹ Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na?

Jesús dxezrine' lau bxruze blau

(Mt. 26.57-58; Mr. 14.53-54; Lc. 22.54)

¹² Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulél-le' Jesús, ne buluchéaje' Le'.

¹³ Nadxa guleché'e Jesús lizre Anás. Anás nigá naque' xrtau zri'ine Caifás, bénnea' naque' bxruze blau iza na'.

¹⁴ Caifás nigá naque' bénnea' guzre' judío blau ca' gácadxa chawe' gate tuze benne' waláz chee xezr la xu chee'.

Pedro dxenné' quebe núnbe'e Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'.

¹⁶ Pedro begá'ane' dxu'a dxa xu'u da zua chale'aj na'. Chee le' na' bdxuaj bénnea' núnbea bxruze blau

le', na' bchálajlene' nu'ula zua dxu'a dxa xu'u na',
na' gulu'e Pedro chale'aj na'.

¹⁷ Nadxa nu'ula na' zua dxu'a dxa xu'u bchebe'
Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

¹⁸ Lawe' da dxun na zaga, benne' wen zrin ca',
ne benne' xra'aga wen zrin chee bxruze ca' ba
zaj nabeque' xi', ne zaj ze' dxu'a xi' na' dxelex-
ezré'ene'. Pedro ze' nen benne' ca', dxexezré'ene'
dxu'a xi' na'.

Bxruze blau dxuchebe' Jesús

(Mt. 26.59-66; Mr. 14.55-64; Lc. 22.66-71)

¹⁹ Bxruze blau guzú lawe' dxuchebe' Jesús nuca
benne' ca' zaj naque' benne' dxusédené', ne bi da
dxusédené' le'.

²⁰ Jesús guzre' le':

—Neda' ba bchálajqueza' lávela xúgute bèneache.
Bsédequeza' lu xu'u ca', ne lu xu'u naga dx-
elezraga xúgute benne' judío ca'. Quebe bi
bchálaja' bagácheze.

²¹ ¿Bizr chee na' dxuchebe' neda'? Bchebe
benne' ca' ba belenne' chia', na' le' xelenné' bi
da bchálajlena' le'. Benne' ca' zaj nézene' da ba
gunnéa'.

²² Gate gunná Jesús da nigá, na' tu benne'
xra'aga wen zrin chee xudau', benne' ze' na', gu-
dape' xraga Jesús, na' gunné':

—¿Caní dxexechebu' lau bxruze blau nigá?

²³ Jesús bechebe':

—Che gunnéa' tu da calela, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

²⁴ Nadxa Anás gusél-le' Jesús, zaj nadxéaj ne'e, lau Caifás, bxruze blau.

*Pedro dxenné' xecha lasa quebe núnbe'e Jesús
(Mt. 26.71-75; Mr. 14.69-72; Lc. 22.58-62)*

²⁵ Dxácate na' ze Pedro dxu'a xi' na' dxex-ezré'ene', na' gulé'e le':

—¿Quebe nacu' lue' tu benne' ca' zaj naque' tuze nen bénnea'?

Na' Pedro gunné':

—Quebe naca'.

²⁶ Nadxa tu benne' wen zrin chee bxruze blau, benne' naque' xrtia bénnea' guchugu Pedro nague', bchebe' le':

—¿Quegá ble'eda' lue' nen bénnea' naga zaj ze xaga olivo ca'?

²⁷ Pedro gunné' xecha lasa:

—Quebe núnbe'a bénnea'.

La' ná'queze gudxezre xjeaj.

Jesús dxezrine' lau Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxaní'sise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua.

²⁹ Chee le' na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá'?

30 Belexechebe benne' ca':

—Chela ca naque' tu benne' wen da zrinnaj, quebe gudentu' le' lau'.

31 Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee'e.

Belexechebe benne' judío ca':

—Netu', benne' judío, quebe naca cheentu' nu gútentu'.

32 Ca'an guca, guca li ca naca da ba gunná Jesús ca gatie'.

33 Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee' judío ca'?

34 Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

35 Pilato bechebe':

—¿Naca' neda' judío? Benne' xezr la xu chiu', ne benne' xíchaje' ca' chee' bxruze ca' buludé'e' lue' lawa' neda'. ¿Bizra be'nu'?

36 Nadxa bechebe Jesús:

—Naga dxenná be'a quebe naca na chee' xezr la xu nigá. Chela naca na chee' xezr la xu nigá, na' benne' ca' zaj naque' neda' tuze welásaqueze' chee' quebe tea' neda' lu na' benne' judío caní. Naga dxenná be'a quebe naca na nigá.

37 Nadxa guzre Pilato Jesús:

—¿Nacu' Lue' wenná bea?

Bechebe Jesús:

—Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee' nnia' da li.

Xúgute benne' ca' dxelune' ca' dxenná dizra' chee da li dxellenne' da dxennéa' neda'.

³⁸ Pilato gunné':

—¿Bizra na' da li?

Dxelechugue' chee Jesús gatie'

(Mt. 27.15-31; Mr. 15.6-20; Lc. 23.13-25)

Ca gudé bchebe Pilato Jesús caní, na' bdxúaje' xetú. Bchálajlene' benne' judío ca', na' guzre' le':

—Neda' quebe bi da calela dxezrelda' nun benne' nigá.

³⁹ Le'e zua tu da zéajlele. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee judío ca'?

⁴⁰ Nadxa xúgute' gulenné' zizraj:

—¡Quegá benne' nigá! ¡Bsan Barrabás!

Barrabás na' naque' gubán.

19

¹ Nadxa Pilato guqué'e Jesús, na' bdxixruj bé'ene' xelu'e Le' xide'.

² Benne' dxjaque' wedil-la buluzrié' xichaj Jesús tu da' belune' zruze xaga xeche', ne bulugácue' Le' tu ladxe' bzawe.

³ Nadxa guléchaje' Le', dxelenné':

—¡Gaca ba lue', wenná bea chee judío ca'!

Nadxa belú'e dxu'a lau Jesús.

⁴ Nadxa bdxuaj Pilato da xula, ne guzre' benne' ca':

—¡Le nna'xque! Dxebéaja' benne' nigá chee nézele quebe dxezrelda' bi da zrinnaj nabague'.

⁵ Bdxuaj Jesús zria xíchaje' da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':

—Nigá zua bēnea'.

⁶ Gate benne' xíchaję ca' cheę bxruze ca', ne xra'aga wen zrin cheę' ca' beelé'eng' Jesús, na' gulezú lawę' dxelenné' zizraj:

—¡Bde'e xaga béguaj! ¡Bde'e xaga béguaj!

Pilato guzre' benne' ca':

—Le che'e, ne le gudé'e xaga béguaj lé'eqeze, lawe' da quebe dxezrelda' bi da zrinnaj nabague'.

⁷ Na' benne' judío ca' belexechebe':

—Netu' nápantu' tu da nadxixruj bea na, ne ca dxenná na dxal-la' gatie' lawe' da dxun cuine' Zri'ine Dios.

⁸ Gate ben Pilato da nigá, na' bezrébedxę'.

⁹ Bexu'e xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

¹⁰ Nadxa guzre Pilato Le':

—¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

¹¹ Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Cheę le na', bēnea' bdeę' neda' lu na'u dul-la zrendxa nabague' ca lue'.

¹² Lu zra na'tę gudilaj lazre' Pilato ájala gunę' gusanę' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bēnea' dxenná bea Roma. Nu benne' dxun cuine' wenná bea dxedábague' César.

¹³ Nadxa Pilato, gate benne' da nigá, bdxixruj bé'eng' xelexebéaję Jesús, na' gudxé'e lataj blau

chee', da zua lataj na' nazí le na Gabata nen dizra' hebreo, da zéaję na chale'aj xiaj ta'a.

¹⁴ Naca na zra za zrin Laní Pascua, ca du wagu-bizra. Nadxa Pilato guzre' benne' judío ca':

—Nigá zua wenná bea cheele.

¹⁵ Na' benne' ca' gulenné' zizraj:

—¡Gatié'! ¡Gatié'! ¡Bde'ę xaga béguaj!

Pilato guzre' benne' ca':

—¿Gudá'a wenná bea cheele xaga béguaj?

Belexechebe benne' xíchaję ca' chee bxruze ca':

—Netu' zua tuze wenná bea cheentu'. ¡César!

¹⁶ Nadxa Pilato bdeę' Jesús lu na' benne' ca' chee te'ę xaga béguaj, na' guleché'ę Jesús.

Jesús dxedé'ę xaga béguaj

(Mt. 27.32-44; Mr. 15.21-32; Lc. 23.26-43)

¹⁷ Na' bdxuaj Jesús nu'ę xaga béguaj chee chéaję' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota.

¹⁸ Buludé'ę Jesús xaga béguaj lataj na', na' tu zren nen Jesús buludé'ę xechupa benne' xaga béguaj ca' chalá'a weaj naga da' Jesús.

¹⁹ Pilato bdxixruj bé'ene' buluzúę' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee Judío Ca'.

²⁰ Zane' benne' judío ca' bululabe' da na' lawe' da zua lataj na' naga buludé'ę Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín.

²¹ Chee le na' benne' xíchaję ca' chee bxruze chee judío ca' gulé'ę Pilato:

—Quebe guzúaju' na: Wenná Bea Chee Judío Ca'. Bzuaj na: Le' Gunné' Naque' Wenná Bea Chee Judío Ca'.

²² Bechebe Pilato:

—Da bzuaja', ba naxúajqueze na.

²³ Ca gude buludá' benne' dxjaque' wedil-la Jesús xaga béguaj, na' belexequé'e zra lané', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na.

²⁴ Chee le na' benne' dxjaque' wedil-la gulé ljwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléaje' da gunna bea na chee le na. Caní belún benne' dxjaque' wedil-la.

²⁵ Gáguze naga zua xaga béguaj chee Jesús ze xrna Jesús nen bi bila xrne'e, ne María, zru'ula Cleofas, ne María Magdalena.

²⁶ Gate ble'e Jesús xrne'e, ne cuita xrne'e na' ze Juan, benne' bsede Jesús, bénnea' nazri'idxe', na' guzre' xrne'e:

—Nú'uladau', na' ze zri'inu'.

²⁷ Nadxa guzre Jesús bénnea':

—Na' ze xrna'u.

Zra na'te benne' nigá beche'e nu'ula na' lizre'.

Dxate Jesús

(Mt. 27.45-56; Mr. 15.33-41; Lc. 23.44-49)

28 Ca gudé gunná Jesús da nigá, lawe' da nézene' xúgute na ba guca li, ne chee guca li ca naxúaj na lu xiche chee Dios, gunné':

—Dxebíleda'.

29 Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús.

30 Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutie'.

Tu benne' dxeje' wedil-la dxechizie' xia lachú'u Jesús

31 Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'ane' lawe' da naca zra na' tu zra blau. Chee le na' gulenabe' lau Pilato dxixruj bé'ene' xelíchaje' ni'a benne' ca' zaj de'e xaga béguaj ca', ne xelexequé'e le' le'e xaga béguaj ca'.

32 Nadxa tu benne' ca' dxjaque' wedil-la gudíchaje' ni'a benne' nedxu na', ne cá'aqueze chee benne' xetú de'e cuita Jesús.

33 Gate bzrine' naga da' Jesús, blé'ene' ba gutie', na' chee le na' quebe gudíchaje' ni'e.

34 Tu benne' ca' dxjaque' wedil-la guchízie' xia chee' lachú'u Jesús, na' bdxuaj dxen, ne nisa na'.

35 Benne' dxuchalaj da nigá naque' benne' blé'ene' na, ne dxuchálaje' da li, ne nézene' dxenné' da li, chee cá'aqueze le'e chéajle chee Jesús.

36 Da caní guca na chee guca li ca da naxúaj na lu xiche chee Dios, da dxenná na: Quebe gulíchaje' netú zrita chee'.

³⁷ Xetú da naxúaj na lu xiche chee Dios dxenná na: Welelé'ene' bénnea' belune' we'.

Dxulucache' Jesús

(Mt. 27.57-61; Mr. 15.42-47; Lc. 23.50-56)

³⁸ Ca gudé na' José, benne' xezre Arimatea, xea-jnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús.

³⁹ Cá'anqueze Nicodemo, bénnea' xeajchálajlene' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre.

⁴⁰ Nadxa José, ne Nicodemo belexequé'e Jesús, na' buluchele' Le' ladxe' nen nedxe na' ca naca da zjácále benne' judío ca' da dxelune' chee benne' gate', gate na' dxulucache' le'.

⁴¹ Lataj na' naga buludé'e Jesús xaga béguaj zua tu lataj naga zaj ze xaga ca', na' lávela lataj na' zua tu ba cube le'e xiaj na', naga quebe nu ne chú'unqueze benne' gate'.

⁴² Lu ba na' belegu'e Jesús lawe' da zua ba na' gáguze, ne lawe' da ba dxebía gubizra, ne ba zua su lau zra dxulupá'ana judío ca'.

20

Jesús dxexebane' ládujla benne' gate

(Mt. 28.1-10; Mr. 16.1-8; Lc. 24.1-12)

¹ Zra nedxu, guxíaj María Magdalena dxu'a ba na' dxaní'sise', gate ne nachúl-late, na' blé'ene' québedxa naduse xiaj dxu'a ba na'.

² Nadxa bexíaj chégüē' naga zua Simón Pedro nen xetú benne' bsede Jesús, bēnnea' bzri'idxe' Jesús, na' guzre' benne' ca':

—Ba belequē'e Xránadxu lu ba na', ne quebe nézentu' ga xeajlelú'e Le'.

³ Nadxa Pedro, ne bēnnea' xetú beledxúaje' zjaque' dxu'a ba na'.

⁴ Dxúpate' zjaca chégüē' tu zren, san bēnnea' xetú guzá chégudxe' ca Pedro, ne bzrine' nédxudxa dxu'a ba na'.

⁵ Na' xeajsé' su dxú'ala xeajnné'e lu ba na', na' blé'ene' ladxe' da buluchele' Jesús xu'u na na', san quebe guxú'e lu ba na'.

⁶ Ca gudé na', bzrin Simón Pedro, na' guxú'e lu ba na'. Cá'anqueze le' blé'ene' ladxe' na' xu'u na na',

⁷ ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chalá'ala.

⁸ Nadxa cá'anqueze guxú'u bēnnea' xetú, bēnnea' bzrin nedxu dxu'a ba na', na' blé'ene' ladxe' ca', ne guxéajle'e.

⁹ Quebe ne xeléajni'ine' da naxúaj na lu xiche chee Dios da dxenná na xebán Jesús ládujla benne' gate'.

¹⁰ Nadxa benne' ca' bsede Jesús belexezrine' xu'u naga zaj zre'e.

Jesús dxulé'e lawe' María Magdalena

(Mr. 16.9-11)

¹¹ María begá'ane' dxu'a ba na', dxebezre'. Ca dxebezre' na', na' gulégüē' dxenné'e lu ba na',

¹² na' blé'ene' chupa gubáz chee xabáa zaj nácuē' zra lane' chiche, zaj dxe'e naga guxú'u Jesús. Tue'

dxe'e naga guzrúa xichaj Jesús, na' xetúe' dxe'e zeaj zranle ga guzrúa ni'a Le'.

13 Na' buluchebe gubáz chee xabáa ca' María na':
—Nu'ula, ¿bizr chee na' dxebezru'?

Le' guzre' gubáz chee xabáa ca':

—Lawe' da belú'e Xrana', ne quebe nezda' ga xeajlelú'e Le'.

14 Caní dxenné', na' bzéchaj xíchaje', ne blé'ene' Jesús ze' ca'ala, san quebe nézene' che Jesús na'.

15 Nadxa Jesús bchebe' María na':

—Nú'uladau', ¿bizr chee na' dxebezru'? ¿Nu dx-exíaju'?

María gúquene' naque' benne' dxá'ane' xaga ca' zaj ze' na', na' guzre' Le':

—Benne', che lue' bi'u Le', gunná ga xeajlú'u Le', chee cheajzezri'a Le'.

16 Nadxa Jesús guzre' nu'ula na':

—María.

María na' bexéchaje', ne guzre' Le' nen dizra' hebreo:

—¡Raboni!

Dizra' nigá zéaje na: Benne' Dxusede.

17 Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxezre bi bícha'dau' ca', benne' ca' bsédeda', xegüéna' naga zua Xra', ne nácaqueze' Xrale. Naque' Dios chia', ne Dios chee.

18 Nadxa bexíaj María Magdalena, xeajzenne' benne' ca' bsede Jesús ba blé'ene' Jesús, na' Le' guzre' le' da caní.

*Jesús dxulé'e lawe' benne' ca' bsédene'
(Mt. 28.16-20; Mr. 16.14-18; Lc. 24.36-49)*

19 Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bse de Jesús, ne zaj nusézxuje' dxa xu'u ca' lawe' da dxelezrebe' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

20 Ca gudé gunná Jesús da nigá, na' blé'ene' benne' ca' ne'e, ne le'e naga gudé xia na'. Benne' ca' bse de Jesús gulebéle'ene' gate belelé'ene' Xránadxu.

21 Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'aqueze dxusel-la' neda' le'e.

22 Nadxa blube' lau benne' ca' ne guzre' le':

—Le si' Be' Lá'azxa chee Dios.

23 Benne' ca' dxunité laule le'e chee dul-la zaj nabague' ba bnite lau Dios chee', na' benne' ca' quebe dxunité laule le'e chee dul-la zaj nabague', quebe bunité lau Dios chee'.

Tomás dxelé'ene' Xránadxu ba bebane'

24 Tomás, tu benne' chazrinnu ca' bse de Jesús, bènea' le' Bi Lide', quebe zue' nen benne' ca' xezícadxa gate ble'e lau Jesús.

25 Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu chee bdiduj ca', ne gudéa' na'a le'e naga gudé xia na', québequeze chéajle'a.

26 Ca guca xrunu' zra, benne' ca' bse de Jesús zaj nazrágaqueze' lu xu'u na' xetú lasa, na' zua Tomás

nen benne' ca'. Nadxa, lácala zaj naxezxuj dxa xu'u ca', ble'e lau Jesús lau benne' ca', ne guzé' laduj le', na' bgape' le' diuzre, gunné':

—Le gapa xel-la' dxebeza zri lazre'.

²⁷ Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

²⁸ Nadxa bechebe Tomás:

—Xrana', ne Dios chia'.

²⁹ Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrente naca na chee benne' ca' dxeléajle'e chia' lácala quebe ne xeledé'ene' neda'.

Da dxaca lazre' Juan gun xiche nigá

³⁰ Jesús bene' da zandxa xel-la' waca zrente lau benne' ca' bsédene' da quebe zaj naxúaj na lu xiche nigá.

³¹ Da caní zaj naxúaj na chee chéajlele le'e chee Jesús, naque' Cristo nasel-la Dios, ne Zri'ine Dios, ne chee gápale xel-la' nabán lawe' da dxéajlele chee'.

21

Jesús dxulé'e lawe' gazre benne' ca' bsédene'

¹ Ca gudé na' Jesús ble'e lawe' lau benne' ca' bsédene' dxu'a nísadau' chee Tiberias. Caní guca na.

² Zaj nazraga Simón Pedro, ne Tomás, bénnea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús.

³ Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'lentu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'.

⁴ Ca guzú lau dxaní'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'.

⁵ Nadxa Jesús guzre' benne' ca':

—Bénne'dau', ¿quebe nu bela ne senle?

Belexechebe benne' ca':

—Quebe bi ne sentu'-ba'.

⁶ Nadxa guzre Jesús benne' ca':

—Le guzala xixruj na' chalá'a xabela chee da dxedá lawe' nísadau' na', na' senle bela.

Ca' beluné', na' ca dxelexequé'e xixruj na' quebe dxelexegué'ene' na lawe' da nazrate na bela zan.

⁷ Nadxa bénnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázie' ladxe' dxexrúa cuzre' lawe' da nagü'e na, na' bexétaje' lu nisa.

⁸ Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dxelexezrube xu'e xixruj na' nazrate na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj.

⁹ Gate belexétaje' lu xu bizre, na' belelé'ene' ba dxe' xi', ne ba zrua tu bela lawe' xi' na', na' de na' xeta xtila.

¹⁰ Nadxa Jesús guzre' benne' ca':

—Le cheajxrí' tu chupa bela ca', be za guzéntele.

¹¹ Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazrate na bela zri'a, tu gaxúa chi'inu xunba', na' lácala naca tu cá'anteba' quebe gudxeza xixruj na'.

¹² Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchebe' Le' nu Le', lawe' da zaj nézene' naque' Xránadxu.

¹³ Nadxa Jesús guqué'e xeta xtila na', na' bnézruje' na benne' ca', ne cá'anqueze bene' chee' bela ca'.

¹⁴ Da nigá naca na da guxunne' lasa ble'e lau Jesús lau benne' ca' bsédenē' ca' gudé bebane' ládujla benne' gate.

Jesús dxuchálajlene' Simón Pedro

¹⁵ Ca' gudé gulawē' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca' benne' caní?

Bechebe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zríla'du chia' ca'.

¹⁶ Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechebe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zríla' chia' ca'.

¹⁷ Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxel'éne' Le' chawe', na' guzre' Jesús:

—Xran, Lue' nézquezenu' xúgute. Lue' nézenu' dxel'éda' Lue' chawe'.

Na' Jesús guzre' le':

—Bxue zrila' chia' ca'.

¹⁸ Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácu'e' lue', ne che'e' lue' naga quebe gaca lazru' chéaju'.

¹⁹ Gate gunná Jesús da nigá, dxuzéajni'ine' benne' ca' ca dxal-la' gate' Pedro chee' gucá'ana szrene' Dios. Ca gudé na' Jesús guzre' le':

—Ben neda' tuze.

Da gaca chee' bénnea' nazrí'idxa Jesús

²⁰ Gate bexechaj Pedro, blé'ene' bénnea' nazrí'idxa Jesús zéaje nawe' le', naque' bénnea' dxe'e' cuíta Jesús gate na' gulawe' xrche' na', ne bchebe' Jesús: “Xran, ¿nuzra na' gudé Lue' lu na' benne' ca' dxeledábague' lue'?”

²¹ Gate Pedro blé'ene' bénnea', na' bchebe' Jesús:

—Xran, ¿gazra benne' nigá? ¿Aja gaca chee'?

²² Jesús bechebe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na' chiu' lue' nézenu'? Lue', ben neda' tuze.

²³ Belén benne' ca' zaj de'e' Jesús quebe gate benne' na'. Jesús quebe guzre' le' quebe gatie'. Guzre' le': “Che neda' dxaca lazra' xegá'ane' ca zrindxa zra xelá'a neda', ¿naca na' chiu' lue' nézenu'?”

24 Benne' nigá naque' benne' dxexechebe' chee da nigá, ne ba nuzúaje' na. Nézentu' dxenné' da li.

25 Cá'anqueze ne zaj dedxa da zante da ben Jesús, na' chela xuaj tu tu na, dxéqueda' quebe gueque lu xezr la xu nigá cha' xiche ca' dxal-la' guzúajdxu. Ca' nāca na.

**Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

80626b72-93df-58ae-9f5e-9d86733fab46